

Minister Glenbert Croes;

“Aruba mester ta prepara como pais pa e transicion pa Green Hydrogen”



Pagina 3

- **A instrui Utilities pa hunto cu WEB y ELMAR presenta plan di accion den 30 dia**

Pagina 6


- **Tweede Kamer ta declara refinanciamento di debe y tratamiento di RAft no controversial**

Pagina 2

- **Proyecto di Wilhelminastraat y Columbusstraat lo mester keda cla otro luna**


Pagina 4

Colegio San Antonio ta adapta reglanan di scol pa uso di telefon pa alumnonan



Pagina 2

Soldaat Hulandes ta muri durante
entrenamento na kazerne di
Schaarsbergen



Pagina 9

Venezuela: Crisis y migracion ta influi den e
aumento di abuso sexual infantil



Pagina 11

Colegio San Antonio ta adapta reglanan di scol pa loke ta trata uso di telefon pa alumnonan

Mediante un publicacion riba nan Facebook Page, Colegio San Antonio a anuncia cu for di e aña aki nan a adapta reglanan di scol pa loke ta trata uso di telefon pa nan alumnonan caminda nan por haci uso di dje den pauze of den un vrije lesuur.

Uso di telefon na scol ta topico di discusion na scolnan riba nos isla, den region, na Merca, Europa. Cu otro palabra e ta un topico actual cu hopi institucion ta deal cune awendia.

“Nos ta consciente cu e telefon celular ta un distraccion pa nos alumnonan. P’esey desde e aña aki a adapta reglanan di scol caminda cu e alumno ta liber pa usa su telefon den pauze of un vrije lesuur pero durante les ta warda esaki den tas, baki riba mesa of den hoesjes na muraya. E docente ta indica na cua momento e alumno por usa su telefon. Por ehempel, na ora di



usa Kahoot. Pero semper cu un meta educacional.

Alumno cu warda telefon den saco di carson of jacket por risca cu ta tuma e



telefon den beslag. Y si esaki pasa durante prueba, scol ta considera esaki como un intento di fraude (spiek).

Nos ta den e fase di implementacion y

ta compronde cu e ta tuma tempo. Pa hopi alumno e telefon celular a bira manera e di 79 organo importante na su curpa. P’esey docentenan tin hopi pasenshi den e fase aki.

“Nos ta spera cu e cambio den maneho aki duna su fruto. E meta mas importante: e alumno ta mas gefocused den les y por concentra y participa optimalmente. Dependencia di telefon celular no ta conta pa alumno so, pero pa hopi adulto tambe.” Nan a señala. Uso di telefon ta genera un interesante debate na unda tur opinion ta valido, tur di nan tin e mesun obhectivo “lo miho pa nan alumnonan” for di diferente angulo y vision.

E comunicado a causa cu basta usuario di e red social aki a share e post pa asina duna nan apoyo na e iniciativa aki mirando cu di e forma aki e alumnonan por enfoca un poco mas riba nan estudio y docentenan tambe por sigui e mesun chemplo.

Refinanciamiento di debe di Covid-19 y tratamiento di RAft declara no controversial pa Tweede Kamer

Recientemente Aruba tabata den espera pa e decision cu tanto Gobierno di Aruba y Gobierno di Hulanda lo mester a tuma pa loke ta trata e Ley di Reino di Supervision Financiero (RAft). Despues di diferente combersacionnan y reunion den Parlamento di Aruba, Gobierno di Aruba a dicidi cu no ta acepta e ley di RAft.

Ayera, a traves di e medio di noticia local Noticia Cla, por a lesa cu e tema di refinanciamiento di Aruba su debe di Covid-19 y e tratamiento di ley di RAft no a keda declara controversial. Esaki ta nifica cu e tema por sigui keda trata normalmente pa e gabinete demisionario Rutte IV.

Segun e portal ta informa, ayera mainta Tweede Kamer su comisionnan a trata e temanan di e lista largo, riba cual e temanan di refinanciamiento di e debe di Covid-19



y tratamiento di ley di RAft, tambe tabata aparece.

Segun confirmacion cu No-

ticiaCla a ricibi for di BZK, e dos temanan en cuestion no a keda declara controversial, un alivio y bon noticia paso-

bra e Gabinete y Secretario di Estado Hulandes, Alexandra van Huffelen por sigui ofrece Aruba, como tambe Corsou

y Sint Maarten, refinanciamiento di e debe di Covid-19.

Ademas di esaki pa Aruba especificamente lo sigui trata e ley di RAft di un forma normal, cu tur su implicacionnan.

Den caso cu Tweede Kamer lo a declara e dos temanan aki controversial, esaki lo a nifica cu no lo a ta trata nan mas y lo a warda esaki pa e proximo gobierno cu sinta despues di e eleccion di Tweede Kamer na November proximo.



Minister di Energia Glenbert Croes

“Aruba mester ta prepara como pais pa e transicion pa Green Hydrogen”

Recientemente minister di Integracion, Labor y Energia, Glenbert Croes, a anuncia e Memorandum of Understanding (MoU) cu Utilities Aruba N.V., WEB, ELMAR, Refineria di Aruba (RdA) a firma cu Acciona Energia pa realisa e proyecto Green Hydrogen Aruba na unda minister Croes a splica un poco mas tocante e proyecto aki.

E proyecto di Eagle LNG y proyecto di Acciona Energia segun e mes a sigura ta bay co-existi cu otro na unda ta bay tin e posibilidad di tin nan dos disponibel pa economia di Aruba, pa e comunidad y tambe pa exportacion pa loke minister a sigura cu esaki ta bay ta un pilar economico no solamente pa consumo local sino tambe na nivel internacional.

Acciona Energia ta un compania cu tin mas di 45.892 empleado na mas di 40 pais den e 5 continente, cu un record di benta di mas di 11 milyon euro na aña 2022, ademas di esey nan ta conta cu mas di 100 aña di historia cu 50% di control familiar aproximadamente.

Cu 29 aña di experiencia cu parke eolico, molinonan di biento, hidroelectrico, termosolar fotovoltaico cu ta e parti solar y biomasa cu presencia global den e 5 continente y un cantidad di 11.826 MW total instala y 3.160 MW den construccion y comienso di construccion na 2023. Minister Croes a sigura cu nan ta contento di por a scoge Acciona Energia pa e proyecto aki pa motibo cu nan ta e prome operador na mundo cu ta dedica exclusivamente na energia renovabel. Ademas di esey, nan tin un focus multitecnologico cu un capacidad instala activo di 12 GW renovabel sin tin un historia cu fossil fuel.

E introduccion di Aruba cu Acciona Energia a cuminsa na maart di e aña aki unda un delegacion di Gobierno di Aruba conhuntamente cu companianan estatal a bay bishita nan na Madrid, Spaña caminda nan a mira e planta di Green Hydrogen “Power to Green Hydrogen Mallorca” na Lloseta, Mallorca.

Gobierno a informa nan di e



plan energetico nacional cual ta pa converti Aruba den un sila pionero den sostenibilidad y un interes den Green Hydrogen. Na mei ultimo Acciona Energia a bin Aruba pa conoce e sistema y na juli, recientemente a firma e MoU pa por desaroya e Green Hydrogen Valley na Aruba.

Mirando e diversidad di turismo na unda Aruba ta ricibi barconan crucero, cu e proyecto aki tambe por supply hydrogen na e barco crucero utilizando Hydrogen Fuel Cells pa Cold Ironing cu zero emision, e proceso aki ta proporciona energia electrico na un barco cu ta para na waf mientras cu su motonan ta paga y minister Croes a sigura cu e proyecto ta bay co-existi cu Eagle LNG, den esaki el a informa cu pa loke ta trata e barconan a manda nan un ordo pa MAERSK traha cuatro barco pa opera a base di gas natural y 48 barco cu ta haya gefuel door di metanol y e metanol aki mester ta produci cu green hydrogen.

duci cu green hydrogen.

“Ta bay tin un sistema economico unda gas natural y productonan como hydrogen of productonan deriva di green hydrogen ta loke mester bay usa pa fuel economia di futuro,” el a indica.

Pa e proceso aki Eagle LNG ta bay supply e barconan cu ta usa gas natural y tambe lo tin e green hydrogen pa e sistema di Cold Ironing menciona anteriormente. Cu e proyecto aki segun e minister mes a sigura, Aruba lo por bende green hydrogen na region y na Union Europeo na unda cu pa motibo di e guerra entre Rusia cu Ucrania, Union Europeo a dicidi di reduci nan dependencia di fossil fuels for di Rusia y ta premira e consumo di por lo menos 50 biyon m3 di green hydrogen pa aña 2030.

Di e 50 biyon m3 aki, Union Europeo mes por produci domesticamente mas of menos 30% di nan demanda loke ta nifica cu 70% di nan demanda nan lo mester importa loke pa minister Croes ta un gran oportunidad pa Aruba si lo logra di ta un di e prome paisnan cu lo exporta pa Europa y e mesun region.

“E business model pa e Green Hydrogen Valley bira un pilar economico substancial a base di exportacion y tur loke nos lo usa localmente, e impacto ta bay ta increibel.” El a sigura.

Cu green hydrogen por produci ammonia y cu amoniaco por produci fertilisante pa refrigeracion, industria di textil, industria farmaceutico y pa transporte, tambe por produci e-Methanol pa chemical feedstock, plastic, fuel, entre otro.

Aruba lo por bende e-Methanol pa barconan y den esaki e marca di barconan mas grandi na mundo menciona anteriormente MAERSK, tin un mision pa decarbonisa e

transporte oceanico y ta bira e perspectiva pa clientenan grandi pa e uso aki na unda Aruba ta conoci mundialmente den mundo maritimo tanto pa barconan industrial, crucero y e wafnan cu ta ideal pa suministra e e-fuel aki pa nan manera minister Croes a bisa.

Tambe a expresa cu Aruba su Green Hydrogen lo por cumpli cu e normanan di Union Europeo y ta competitivo den costonan pa motibo cu un di e cost driver ta e costo di electricidad y mirando cu Aruba ta un di e paisnan top 5 na mundo pa genera electricidad a base di molina di biento por produci electricidad limpi y na un bon prijs.

Den e beneficienan di green hydrogen pa Aruba, tin empleo y experiencia local na unda minister Croes a splica cu un industria di green hydrogen lo trece oportunidad di empleo pa Arubianonan y lo yuda Aruba desaroya cu experiencia local y por exporta experticio pa otro paisnan cu kier desaroya nan industria.

Tambe por obtene entrada di exportacion di e green hydrogen, green ammonia, e-Methanol y otro combustibel sintetico traha cu green hydrogen.

Pa finalisa, minister Croes a señala cu “Aruba mester ta prepara como comunidad, como pais y como economia pa tambe haci e transicion aki”, pa motibo cu e green hydrogen lo ser produci na Aruba y ta propone pa den futuro e prome fase cuminsa na nivel local cu fuels cells den hotelnan y edificionan publico igualmente pa loke ta trata Cold Ironing.



A pesar di retraso, proyecto di Wilhelminastraat y Columbusstraat lo mester keda cla otro luna

Dialuna ultimo den Parlamento di Aruba a tuma luga un reunion publico na unda a trata, y a aproba, e presupuesto supletorio di año 2023. Durante su discurso y oportunidad di miembronan di parlamento Minister di Economia, Comunicacion y Desaroyo Sostenibel, Geoffrey Wever, a elabora ariba e proyectonan andando pa revitalisacion di centro di Oranjestad y San Nicolaas.

Minister Wever a splica cu a haci diferente ahuste na e presupuesto pa asina por logra tin fondonan pa inverti tanto den centro di Oranjestad como den centro di San Nicolaas e año aki ainda. A base di e ahustenan realisa, el a indica, tin un suma di 1 milyon florin den su totalidad pa haci inversionnan, suma cu a keda aproba pa Parlamento di Aruba durante e reunion publico.

El a elabora cu año pasa caba den 2022 gobierno a haci inversion den e proyecto pa e cas nobo di Departamento di Asuntonan Economico cu ta un monumento conoci y cu pa hopi año tabata bandeda den centro di ciudad. “Nos a pensa cu esaki por ta un proyecto iconico pa asina cuminsa e desaroyo di centro di Oranjestad,” el a remarca.

Pa cu esaki, el a indica, nan a haci un inversion di 610 mil florin cu aprobacion di parlamento y e proyecto en cuestion ta den su desaroyo. A pesar cu ainda no a mira e prome piedra, si a haci un proceso di destaho publico pa scoge e arquitecto pa e proyecto, un proceso cu ta den man di Monumentenfonds.

Ademas di esaki, el a agrega, nan a combina e proyecto cu un espacio pa horeca. El a splica cu edificio no ta bay ta cas solamente pa Departamento di Asuntonan Economico, pero mirando cu e ta monumento a percura tambe pa tin un area unda por bin un restaurant of un cafe. “Mi por bisa cu tin animo hopi halto di parti di sector priva pa huur e parti ey di edificio pa asina yuda cubri e gastonan,” Minister Wever a resalta.

Tambe, el a sigui splica, a percura pa e salanan di con-



ferencia ta traha di tal forme cu nan por keda gehuur na terceros.

Año pasa, e mandatario a indica, tambe nan a inicia cu e proyecto di embeyece-mento di Columbusstraat y Wilhelminastraat. Pa cu e proyecto aki, el a resalta, e ta na altura cu tin hopi preocupacion y critica den comunidad y di e comerciantenan den e area

El a splica cu na momento cu nan a diseña e proyecto aki den 2022, y a presente tambe den sala di parlamento, gobierno a aloca 933 mil florin pa por a haci e proyecto completo. E proyecto a bay destaho publico, e proyecto a keda gana y eheccion a cuminsa den e año aki cu fondonan di 2023.

Minister Wever a sigui splica cu den e proceso di eheccion na momento di cobamento a dañá e sistema di rioleering cu, segun e minister ta señala, ta uno hopi bieu y hopi zwak y pa e motibo aki e proyecto a sufrí un retraso ya cu mester a haci un proceso nobo pa busca un contratista pa haci e trabao di infraestructura bao di tera, cu ta proyectonan di tuberia, complica y costoso. Gobierno e ora mester a aloca 788 mil florin pa cubri e parti aki.

“Esaki tabata fondonan cu nos tabatin aloca pa haci otro proyecto den centro di Oranjestad den 2023, pero lamentablemente nan mester keda destina pa drecha e sistema di rioleering y asina continua cu e parti riba tera. Niun hende lo wak, por ta niun hende lo aprecia e inversion pero ta inversion cu mester keda haci pa centro di Oranjestad,” Minister Wever a resalta.

El a indica cu aworaki tur cos ta den proceso y segun e ultimo informenan cu el a ricibi, pa prome siman di october e proyecto aki mester keda entrega completamente.

E minister a remarca cu a inverti mas o menos 100 mil florin den lus, di cual un parti ta pa Oranjestad y un parti ta pa San Nicolaas, y e ta spera cu na october ora cu e proyecto keda entrega por tin e parti di decoracion y e contenido di e plaza cla. “E no tabata solamente inversion den infraestructura, pero tabata inversion den contenido. Nos tin un vision pa centro di Oranjestad, nos kier pa e ta un centro gastronomico caminda tin actividad economico, caminda nos hendenan y turistanan por bin.”

Aworaki, el a splica, tin aloca 500 mil florin extra pa cen-

tro di Oranjestad pasobra e proyecto, despues di haci analisis financiero, mester a keda dividi den tres fase pasobra e ta inclui tambe parti di e parkeo. Cu aprobacion di e fondonan aki ta bay completa e di dos fase di e proyecto di Wilhelminastraat y Columbusstraat pa asina full e area ey keda renoba.

“Nos ta spera e por tin e balor agrega pa nos comerciantenan den e area ey. Nan ta inversionnan, si bo pense bon, inversionnan chikito, pero nos ta spera cu asina nos por demostra cu gobierno ta kere den e desaroyo di centro di ciudad y nos ta haci nos desempeño a pesar cu tin tiki fondonan disponible pa toch trece un cambio real,” el a enfatisa.

Minister Wever a remarca cu como parti di e vision di gobierno y mirando e fondonan limita, nan ta den proceso pa trece e departamentonan di gobierno back den centro di ciudad cu e idea pa trece hende den centro di ciudad pa yuda cu e desaroyo di e centro y actividad economico. “Nos kier yuda door di trece nos ambtenaarnan pa traha den centro di ciudad y fungi como clientela di e mesun comerciantenan,” el a bisa.

Pa loko ta trata San Nicolaas,

el a indica cu nan tin hopi luna ta hiba combersacion cu diferente stakeholders, diferente interesado- y comerciantenan pa wak con por desaroya un proyecto cu tin impacto pa e centro di San Nicolaas.

El a splica cu despues di hopi reunion y sondeo, a diseña e concepto di un proyecto y aworaki esaki ta den e proceso di consultacion cu stakeholdersnan importante di partiba di brug. El a remarca cu pa gobierno ta hopi importante cu na momento cu nan aloca fondonan publico, cu nan ta parti di un integracion y vision di gobierno y locual e comerciantenan mes tambe ta desea.

“Asina nos a yega na traha un concepto di un proyecto y e proyecto na e momento aki ta den preparacion. A manda invitacion pa stakeholders duna nan aporte y aworaki basa riba esey, e proximo paso ta pa e departamentonan di gobierno prepara e proyecto,” el a bisa.

Minister Wever a indica cu e prome fondonan cu parlamento a aproba, 500 mil florin den e cambio di presupuesto 2023, ta pa e año aki tin e fondonan necesario pa por cuminsa cu e parti di desaroyo suave di e proyecto y pa año 2024 tin fondonan aloca caba den e presupuesto cu ta biniendo parlamento.

Minister Wever tambe a toca e tema di Paypal den su contesta. El a splica pa cu esaki nan tambe ta desapunta cu riba e prome acercamento e compania aki no a bisa cu nan kier bin Aruba pa inverti.

El a agrega cu pa años caba a traves di Banco Central ta haciendo intentonan serio pa por logra establecimiento di Paypal of companianan similar na Aruba, pero, segun el a señala, aparentemente no tin e apetito comercial pa inverti den Aruba, segun e sondeonan cu Banco Central a haci y e contactonan cu tabatin entre Banco Central y Paypal pa varios año caba.

Pro ultimo el a indica cu lo tuma otro iniciativa otro año pa wak si por logra trece otro companianan parecido pa Aruba.

Editor

Caribbean Speed Printers N.V.
Aruba Bank N.V. Acc. #332668
Caribbean Mercantile Bank N.V.
Acc. #23951903
RBC Royal Bank Acc. #13307728

Operations Manager

Mariette Engelhart

Redaccion

noticia@bondia.com

Pilar Flores (hefe di redaccion)

Angenette Figueroa (closer editor)

Leo Maduro

Andreina Morillo

Raisa Montilla

Oriana Geerman

Ehecutivo di Benta

sulaika.croes@cspnv.com

Sulaika Croes

Aviso y Arte

Sandra Loefstop

Lisa Tromp

Departamento Digital

Juan Luis Pinto

Administracion

accounting@bondia.com

Martha Arteta de Ariza

Distribucion

Jenny Kelly

Coleccion

Evelinda de Cuba - Tromp

Pre Press

Luis Fernando Arenas (Hefe)

Pablo Libre

Press

Roland Schenker (Hefe)

Omar Ramirez

Martin Boekhoudt

Francis Dirksz

Colaboracion

Associated Press

Ret Karibense

Data Key

Afiliacion

Sociedad Interamerica
di Prensa (SIP)

DIRECCION

Adres: Weststraat #22

Tel: 582-7800

Email: noticia@bondia.com

aviso@bondia.com

info@bondia.com

Website: www.bondia.com

Facebook: @bondianoticia

Instagram: bondiaaruba

BON DIA ARUBA ta un corant
redacta y imprimi na Aruba y ta
obenibel di dialuna te cu diasabra.
Ningun contenido por wordo reproduci
sin permiso di editor.



Editorial

Escasez di trahador...

Ta urgi debate di aministia...

Cifra di desempleo general a baha te na 4,3%, segun e ministro encarga cu entre otro Labor. Esaki a keda presenta como un hazaña nunca visto den ultimo binti aña. Suponiendo cu e forma cu a yega na e cifra aki ta corecto, esaki anto ta refleha un situacion indicativo cu economia ta creciendo rapidamente, cu e consecuencia cu desempleo a baha considerablemente tambe. Sin embargo, esaki ta motibo pa hubilo? Reduccion di desempleo ta algo bon, pero e ta trece su retonan cune. Kico ta e caso?

Pa cumenza, un cifra di 4,3% ta hopi cerca caba di e cifra cu expertonan ta yama 'frictional unemployment'. Kico esaki ta? Esey ta e parti di e desempleo cu ta considera e parti 'natural', e parti minimo semper lo t'ey. Hende cu ta cambiando di trabao pero no ta kita di un lugar y drenta otro servicio inmediatamente. Hende cu a caba di studia y cu ta buscando un empleo na nan nivel; nan ta desemplea pero no ta disponible pa cualkier trabao. En todo caso, esaki ta haci cu algun porcionto di desempleo por ser considera 'frictional'. Antes esey tabata considera 5% porcionto pero cu tempo y a base di experiencia den varios pais, por bisa awor cu 2 pa 3% ta considera e categoria aki.

Kico esey ta significa den practica? Cu den cierto sector o den cierto profesion mester por tin un situacion di escasez caba. Esey ta e caso na Aruba? Sigur cu si, entre otro den sector turistico y den construccion, pero tin mas. Lo ta bon si banda di un mero cifra general e departamento concerni cumenza produci dato mas specifico, unda tin escasez y ki tipo di empleo ta buscando. Un departamento gubernamental no t'ey solamente pa procesa permiso sino tambe pa duna informacion mas amplio na comunidad y na nos economia. Datonan di desempleo specifica ta di sumo importancia pa planificacion economico, sin embargo te awe no ta tuma esaki na cuenta y no ta publica esakinan.

Un pregunta hopi importante pa contesta ta di unda e caida repentino aki di desempleo ta bin. Un promer pensamiento ta cu esaki ta debi na e recuperacion economico, loke sin duda algun ta hunga un papel, pero esey no ta splica tur cos. Loke mester tuma na cuenta ta cu desde 2019 te awe nos poblacion (oficial) a cay cu alrededor di 2.000 persona, di algo mas di 109.000 na 2019 te algo mas di 107.000 na 2022. Esaki ta haci cu e grupo di e poblacion cu ta considera e parti economicamente activo, hende emplea y desemplea, hunto considera e categoria 'beroepsbevolking', ta muestra un caida mas grandi ainda, di alrededor di 58.500 na 2019 te

53.800 na 2022. E ultimo aki ta cifra di e propio departamento di Labor.

Banda di esaki nos por observa e cifranan di SVb cu ta muestra un aumento grandi durante 2022 y e promer 9 luna di 2023 di e cantidad di cupo di trabao, y empleado, registra den e periodo aki. Esaki ta un proceso anto cu tin dos banda: e banda di trahador disponible, cu a keda reduci, y e banda di oferta di empleo, cu a aumenta drasticamente tambe.

Kico ta haci cu escasez y amnistia?

Loke e mandatario no a atende 'at all', ta e pregunta clave: kico pa haci? Sigur pasobra e contesta logico ta pa importa mas trahador di exterior. E situacion aki ta sclama pa accion rapido, y esey no por ta simplemente un cuestion di cumenza procesa cu mayor rapidez tur peticion di e empresanan, sin tuma na cuenta e presencia di diezmiles di persona indocumenta cu a haci nan bida aki caba. Realmente nos no por comprende nos politiconan, tanto di banda di gobierno y di oposicion cu aparentemente no ta presta atencion na e asunto aki, cu por ta hiba nos den un situacion cu lo ta bay tin un 'de facto' amnistia, conduci pa e empleadonan publico, sin cu tin regla y norma acorda y aproba politicamente. A caso nan ta prefera en berdad un amnistia 'silencioso' cu e mandatario encarga cu tanto Labor como Integracion por bay haci? Nos ta mira ultimamente varios señal cu ta bin di e mandatario aki, cu ta indica cu e presion di escasez ta bay haci cu mester trahador cu Aruba no tin, y hasta el a indica caba e situacion di e miles di stranheronan aki, pero nos no ta mira un preparacion di un politica explicito di su banda, cu ta splica bon cla den ki direccion nos ta bay, y cual lo ta e reglanan pa e operacion aki. Ta imposible pa laga e evaluacion di miles di caso di persona indocumenta den man di hende cu no tin instruccion estricto pa evaluacion di e casonan. Esaki simplemente lo causa mas irregularidad den e proceso di admision cu nos tin caba, mientras nos no tin ningun seguridad cu a atende e problemanan cronico ey di un manera efectivo.

Ademas, manera nos a indica caba den un anterior Editorial, e eventual 'amnistia silencioso' lo bay tin consecuencia pa e maneho Hulandes encunto ciudadania, pasobra sin duda algun un entrada repentino di miles di persona, cu den varios caso tin hopi aña aki caba, ta bay causa un aumento grandi di peticion pa naturalizacion aki tanto aña. Si nan no tin problema cu esey, tambe ta bon, pero promer cu tur cos aki mes e debate tocante amnistia no por keda posterga mas.

Den conexion cu e problematica di coriente:

A instrui Utilities pa hunto cu WEB y ELMAR presenta plan di accion den 30 dia

Dialuna mainta durante conferencia di prensa di Gobierno, Minister di Energia Glenbert Croes a elabora riba e situacion actual cu tin, na unda cu constantemente coriente ta bay den diferente bari-onan. Mirando cu e situa-cion aki ta uno inacep-tabel pa Gobierno, a pidi Utilities pa liderisa e pro-

ceso en camino cu e com-panianan WEB, Elmar un plan di accion den e prox-imo 30 dianan.

Minister Croes a indica cu comunidad di Aruba ta pa-gando un prijs considerabel pa awa y coriente y corec-tamente ta espera di por tin un calidad di suministro opti-mal. E suministro di coriente

mester ta confiabel y stabiel, specialmente den e tem-ponan aki cu ta hopi calor. E mandatario ta spera cu pron-to e companianan estatal por bin cu un plan di accion, pa asina resolve e problema aki pa nos comunidad.

Mester traha cu un maneho cu ta premira unda inver-sionnan mester wordo haci



pa distribucion y suministro di coriente permanece sta-biel tur caminda na Aruba. Calentamento global ta un fenomeno conoci y como

pais nos mester ta prepara pa por confronta y enfrenta tur e retonan cu esaki ta trece cune.

Den e prome mita di aña 2023 Departamento di Impuesto a registra 3.495 contribuyente nobo

Departamento di Impues-to ta un departamento di gobierno cu tin e tarea pa garantisa entrada di im-puesto y pa facilita e con-tribuyente pa por cumpli cu su debernan fiscal. E ta un tarea cu un respon-sabilidad grandi no sola-mente pa e presupuesto di Pais Aruba sino tambe pa e presupuestonan di otro instancianan di gobierno manera ATA, TPEF, AZV, SVB, DIMAS y DIP.

Prome cu por cobra cualkier tipo di impuesto, ta impor-tante pa identifica y registra e persona y/of empresa concer-ni cu ta genera entrada riba cual lo mester paga impuesto. Esaki ta forma parti di traba-onan rutinario di Departamento di Impuesto. Den e prome mita di aña 2023 e de-partamento a registra un total di 3.495 contribuyente nobo.

Departamento di registracion

Departamento di Impuesto tin su departamento di regis-tracion cu ta atende cu regis-tracion di persona y empresa. Continuamente e departa-mento aki ta percura pa opti-malisa e registro pa esaki keda actual.


E proceso di registracion di un contribuyente nobo pa cualkier tipo di impuesto ta un di e tareanan di e departa-mento cu ta parce facil, pero ta algo cu ta rekeri un bon control di e informacion ricibi. E departamento ta controla e documentonan y e pruebanan di identificacion prome cu hinca e datonan den e sistema digital. Pa por verifica e datonan Departamento di Impuesto ta haya bon cooperacion di fuentenan externo tambe manera Censo, Camara di Comercio, DOW, DIP, Kadaster, DI-MAS, SVB y ATA.

Aki ta sigui un bista di e can-tidad di contribuyente nobo

registra den e prome mita di aña 2023:

	Cantidad (jan-juni 2023)
BBO - Belasting op bedrijf-somzetten	474
BBV - Bijzondere belasting verblijf	134
EP - Erfpacht	198
GB - Grondbelasting	1.411
IB - Inkomstenbelasting	531
LB - Loonbelasting	347
TH - Toeristenheffing	135
WB - Winstbelasting	265
Total	3.495

E cifranan aki ta demostra



e esfuersonan constante cu Departamento di Impuesto ta haci riba tereno di compli-ance pa cu diferente tipo di impuesto.

Hopi informacion ta drenta

Tur dia ta drenta hopi infor-macion pa registracion nobo. Mayoria bes ta ricibi esaki for di un persona of empresa mes, pero tin otro fuentenan tambe cu ta duna infor-macion. Por sosode cu ta ricibi informacion anonimo riba un persona of empresa cu ta ricibi entrada den forma clandestino, esta cu e no ta pagando impuesto.

Pa e grupo aki ta start prome cu un investigacion cu ayudo di otro departamentonan (por ehempel FIOT) pa asina finalmente registra tambe es-nan cu no ta cumpliendo cu impuesto.

Unabes cu registra un per-sona y/of empresa, e ta bira responsabel y mester atende cu su debernan di impuesto. E tin e obligacion pa haci de-claracion di impuesto y haci e pagonan concerni na tempo. Di e forma aki e persona of empresa tambe ta cuminsa contribui cu caha di gobierno y bienestar di nos pais.

Minister Tjon a bishita KIA den cuadro di renobacionnan cu a tuma lug

Minister di Husticia y Asuntonan social Sr. Rocco Tjon, a bishita e instituto coreccional di Aruba, caminda a haya un rondleiding di e ekipo di maneho actual, mirando cu tin diferente renoba-cionnan cu a tuma lug. Entre otro, e Centro di Motivacion (CDM), a wordo renoba por com-pleto, y e plan ta pa e parti aki bay wordo uza bek. Consecuentemente otro renobacionnan tambe lo bay tuma lug paden di KIA pa asina crea binti cupo adicional di cel a corto plaso, caminda por percura pa detene hende



mirando e scarsedad di capacidad di detencion cu tin actualmente.

Hunto cu e ekipo di maneho, a elabora amplio riba e pro-ceso y proyecto pa yega na un instituto coreccional nobo. E dossier completo a wordo entrega na Hulanda dos si-man pasa, y awo ta en espera

di un contesta di Hulanda pa asina por inicia cu e proceso di wak con nos por logra yega na financiamiento pa cu esaki a largo plaso, a traves di un bon colaboracion. Pues, di e forma aki e proceso lo por inicia, mirando cu ta trata di un proceso cu un duracion bastante largo.

Banda di esaki, a wak e avan-cenan pa loke ta e cuidado ba-sico forensico, di cual manera ta conoci, tin diferente pal-abracionnan bilateral cu Hu-landa cual a wordo haci riba e tematica aki. Adicionalmente, den cuadro di e Justitieel Vi-erpartijenoverleg (JVO), e cuidado forensico cu nos mes-

ter brinda na detenido y ho-bennan ta un topico di suma importancia. E aspecto aki, mas y mas ta wordo treci pa-dilanti den rapportnan mane-ra e rapport di CPT, pa cual motibo tin palabracionnan haci cu, a base di un proyec-to piloto, nos ta bay percura pa brinda e cuidado aki na un manera duradero na tur es-nan cu tin mester di esaki.

Pa recapitula, e renoba-cionnan a keda cla, principal-mente e diferente espacionan caminda e expertonan lo mes-ter bay brinda e cuidado basico forensico tambe ta cla, y awo e preparacionnan ta den ehe-cucion pa asina na comienso

di 2024 e proyecto aki por inicia. Di e forma aki tambe ta duna atencion na e parti infrastructural como tambe e parti di personal, mirando cu e reorganizacion a keda cla. Pues, nos lo bay enfoca hopi riba e parti di cuida, cual como pais nos mester brinda na esnan cu ta cay cera, pa di e forma aki duna contenido real na e parti di resocialisa-cion y reintegracion.



E sector di salud na Hulanda ta den problema financiero

(NLTimes)—En averahe, e ganashi di proveedoran di cuido medico a cay drasticamente na 2022 compara cu un año prome, for di 1.9% pa 1.1% y for di 1.494 pa 872 miyon euro. Ganashi por hasta conta pa menos cu 1% un bes cu tur e data ser finalisa. Na mesun momento, e cantidad di proveedo den cora a dobel pa 281, y e cantidad ey por sigui crece. Esakinan ta algun di e conclusionnan cu e compania di consulta y contabilidad, EY, a trek durante nan reunion anual Barometer of Dutch Healthcare.

Credito ta den riesgo, segun EY, aunke e compania no ta preocupa bancarota ainda. E



barometer ta un analisis di e resultadonan di 758 proveedo di cuido medico na Hulanda, cual hunto ta conta pa casi 79.5 biyon euro den entrada. Tin algun diferencia significativa entre nan: “Hospitalnan ainda ta scapa e dificultadnan financiero, pero cuido medico pa salud men-

tal y cuido den plaso largo ta sufriendo di esaki,” segun Rob Leen di EY. E cantidad di proveedo di cuido medico den cora a aumenta, specialmente den cuido pa salud mental y cuido geriátrico.

Costonan halto ta debi na contratacion di partidonan

externo, en particular, aumentando for di 7.8 pa 8.7%. Segun EY, aumentonan den prijsnan di interes, costonan di construccion y huur tambe ta hunga un rol den nan posicion financiero, como tambe e medidanan di coronavirus. “Ta obvio cu e coronavirus tabatin un efecto grandi riba credito,” Ralph Pulssen di EY a nota.

E ta preocupa pa e futuro y ta tuma den consideracion cu “menos inversor ta interesa den asistencia financiero. E facilidad cu cual cada proveedo por recauda placa riba terminonan aceptabel ya ta algo di pasado.” E compania ta cita como ehempel un cas di cuido antiguo unda clientenan ainda ta biba hunto den

un camber cu urgentemente mester ser renoba. E banco a retira for di e trabao aki despues di dos año cu e instituto ey tabata den cora.

EY tambe a adverti cu proveedonan di cuido medico kier continua cu produccion y yena cama pa por haya entrada, mientras cu esaki no semper ta sirbi hende y sociedad. Mester tin mas prevencion.

E sistema complica, e libertad pa escogencia, y e rekisitonan halto tambe mester ser considera, segun EY.

En bes di semper tin e meta pa un 8 of un 9, un 7 kisas lo mester ta aceptabel den cuido medico.

E zomer aki a kibra recorda pa temperaturanan mas halto cu a ser midi

(AP)—Luna pasa no tabata solamente e augustus mas calor cu cientificonan a midi te awo cu ekipahe moderno, pero e tabata tambe a di dos luna mas calor cu a ser midi, net despues di juli 2023, segun WMO y e servicio di clima Europeo, Copernicus, a bisa ayera.

Augustus tabata aproximadamente 1.5 grado Celsius mas calor cu e averahenan pre-industrial. Esey ta e limite cu e tur pais ta purba di no surpasa, aunke cientificonan ta mas preocupa tocante aumento

den temperaturanan durante decadanan, no solamente un temporada cortico manera un luna.

E oceannan di mundo—mas cu 70% di e superficie di mundo—tabata mas calor compara cu den pasado, casi 21 C, y tabata riba nivelnan halto pa tres luna tras di otro, segun WMO y Copernicus a bisa.

Te awo, 2023 ta e di dos año mas calor riba record, net tras di 2016, segun Copernicus. Cientificonan ta culpa e cambio di clima causa pa

actividadnan humano, por ehemplo kimamento di carbon, azeta y gas natural cu un empuhe extra for di El Niño, cual ta un calentamento temporario di cierto parti di e Ocean Pacifico cu ta cambia e tempo rond mundo. Usualmente un fase di El Niño, cual a cuminsa na comienso di e año aki, ta agrega mas calor na temperaturanan global pero mas den e su segundo año.

E datonan nobo riba temperaturanan global a bin mientras WMO a publica su boletin recién riba calidad



di aire di clima, notando cu calor extremo, combina cu incendiandon forestal y stof di desierto, tabatin efectonan significativo riba e calidad di aire, salud di humano y e medio ambiente.

“Si olanan di calor aumenta como resultado di El Niño, tin chens cu nos por espera mas degradacion den calidad di aire en general,” consehero científico pa WMO, Lorenzo Labrador, a bisa.

Plamamento di e malesa Legionnaires den zuid-oost Polonia a cay cu solamente un caso nobo reporta

(AP)—Solamente un caso nobo di e malesa Legionnaires a ser reporta diamars na zuid-oost Polonia den un area cerca di e frontera Ucrainiano, cual ta un indicacion cu e plamamento di e malesa a reduci despues di e desinfeccion di e sistema di awa cu cloro.

E ultimo morto a ser registra diabierna siman pasa, aumentando e grado di morto di 19 despues cu e plamamento a cuminsa na juli. Un total di 166 hende a ser infecta den e region di Rzeszow, algun 80 kilometer for di e frontera.

E region aki ta un sitio importante pa transito di sos-



ten militar internacional pa Ucrania despues cu Rusia a invadi e pais año pasa. Algun 10.000 soldaat Mericano ta staciona den e area. Autoridadnan di salud, fiscalnan

y e agencia di seguridad interno ainda tabata buscando e fuente di e malesa den un region vulnerabel. Expertonan a bisa cu e por bin for di awa cayante den sistema di riool

cu apenas ta ser uza durante temporadan caloroso.

Mortalidadnan for di e malesa tabata entre hendenan anciano cu tambe a sufri for di

otro malesa manera cancer, segun autoridadnan a bisa. E malesa di Legionnaires ta un infeccion pulmonario cu ta ser causa via inhalacion di awa infecta. E no ta plama via awa pa bebe.

Mayoria biaha ta encontra esaki den lugarnan manera hotelnan, hospitalnan of oficinanan unda e bacteria a drenta den e deposito di awa, por ehempel den sistemanan di aircó of cranchi y ducha cu no ta den uzo frecuentemente.

E bacteria ta multiplica den temperaturanan di entre 20 pa 50 grado Celsius. Por trata e malesa aki cu antibiotica.

Minister Javier Silvanía (Coursou):

“Supuestamente a resolve a asunto, pero e tratamiento di faboritismo biniendo for di e departamento di impuesto ta sigui”

(CuracaoChronicle)— Apenas di esfuersonan pa haci cobramiento di impuesto mas husto na Corsou, e minister di finanzas, Javier Silvanía, ainda no por a adresa e sistema cu ta permiti pagadonan capabel of individualna cu conexión haya tratamento di preferencia na e Departamento di Impuesto.

E minister a subraya cu ta inaceptabel cu hende financieramente capabel por regla acuerdonan y solamente paga un fracción di nan debe, mientras cu otro hende cu pension mínimo ta sufri.

E yamada aki ta notabel pa-sobra Silvanía a declara den



parlamento aña pasa cu el a pone fin na e faboritismo pa amigonan y famia na e departamento di impuesto. Segun e minister, individualnan cu posicionnan halto den servicio civil y den sector público ta hayando tratamento di preferencia pa basta aña caba. E grupo aki ta inclui ministernan, parlamentarionan, hefenan di departamentonan, directornan y notarionan di institucionan público of cu-alkier oficial den rango halto den e sector público.

Den casonan aki, aprobacion mester ser duna pa superior-nan na e Oficina di Recipiente prome cu e impuesto ser evalua. Silvanía a declara e tempo ey cu e situacion a

reduci, y cu e gobierno di Pisas a resolve e asunto. Sinembargo, den un declaracion recién, Silvanía a adverti e director di e departamento di impuesto atrobe, Sr. Trona, cu e practicanan aki mester para inmediatamente.

E minister a bisa cu e departamento lo experiencia cambionan grandi den e periodo binidero pa opera mas eficiente y proteha e interes di tur ciudadano. El a subraya cu ta tempo pa pone un fin na e practicanan inhusto y segura cu e sistema di impuesto ta husto pa tur hende, no importa nan situacion financiero.

Coursou:

SER ta habri caminda pa un acercamento holístico pa un mercado laboral inclusivo na Corsou

Riba 31 di october 2023, Konseho Sosial-Ekonómiko (SER) a organisa un simposio cu a titula 'Promoshon di un Merkado Laboral Inklusivo na Kòrsou: Eksplorando Aserkamentunan Inovativo', den cooperacion cu Organisacion Internashonal di Trabou (ILO), Universidat di Kòrsou (UoC), Halto Comisariado pa Refugiado di Nacionnan Uni (UNHCR), y Human Rights Defense Curaçao (HRDC). E simposio tabata tin como meta explora un bista inclusivo pa Corsou, na nivel local y den perspectiva internacional mas amplio.

Dr. Francis de Lanoy, Rector Magníficus di UoC, a presenta su bista durante su discurso cu a titula 'Bridging the Gap between Education and the Labor Market' (Conecta e Buraco entre Educacion y Mercado Laboral). El a enfatisa cu educacion ta e herment principal pa combati pobreza y reduci desigualdad. Sinembargo, el a menciona e deficiencianan di e sistema educacional actual den promocion di exclusividad. Dr. de Lanoy a duna recomendacionnan valioso, incluy-

endo e introduccion na gran escala di formacion vocacional den cooperacion cu un agencia di certificacion, subraya e balor di formacionnan vocacional, estimulacion di espirito empresarial técnico y social, inclusion di empresarionan den desaroyo di un forsa laboral competente, y amplia posibilidadnan di empleo pa graduadonan di formacionnan vocacional dor di un sistema di educacion cu ta enfoca riba competencia y enfatisando aplicacion di habilidadnan di siglo 21. Ademá, e la sugeri pa introduci e asina yama Associate degree den enseñansa di tercer nivel na Corsou, cual lo contribui na un sistema di educacion cu ta conecta miho cu exigencianan di mercado laboral y cu ta promove exclusividad y igualdad di oportunidad. Director di HRDC, Sra. Ieteke 'Inchi' Witteveen, a enfatisa, durante su intervencion, e fragmentacion existente den maneho di retonan actual y a sugeri un enfoque holístico. E la subraya cu ta crucial pa defini na un manera cla kico Corsou kier como pais y con e lo kier establece un mercado laboral inclusivo. Tambe e la pone énfasis riba e importancia di un mercado laboral inclusivo pa

e desaroyo desea, sinembargo mostrando riba e necesidad pa kibra cadenan di dependencia. E responsabilidad pa esaki no ta solamente di gobierno, pero di tur hende. E orado principal di e simposio, Sr. John Bliet, especialista mayor den desaroyo empresarial sostenibel pa region di Caribe di ILO, a enfatisa cu e meta di un mercado laboral inclusivo ta pa crea un miho comunidad, caminda migrantenan ta forma un parti integral. El a yama atencion na e retonan cu migrantenan den region di Latino-América y Caribe (LAC) ta confronta, especialmente hende muhe cu hopi biaha ta traha den economia informal of ta den posicionnan vulnerabel riba mercado laboral. El a enfatisa cu e pais huesped mester enfoca riba fomenta habilidadnan di migrantenan, cual ta genera beneficio manera reaccion mas efectivo riba demanda y oferta di mercado laboral, ampliacion di habilidadnan disponibel, y un contribucion positivo na economia ora cu migrantenan ta traha den sector formal. Sra. Melissa Johns, asesor mayor di desaroyo na e oficina pa e region di Merica di UNHCR, a contribui na e discusion cu informacion



fundamental científicamente y a comparti modelonan exitoso pa un mercado laboral inclusivo for di iniciativanan na Mexico, Brazil, y Ecuador. E modelonan aki a resulta na beneficio di tanto pa migrantenan, manera mas oportunidad di trabou y participacion den sector formal, y tambe na reduccion den nivel di pobreza, como pa e pais huesped, manera un crecimiento di actividadnan economico. Finalmente, Sra. Jeanette Bonet, CEO interino di Curaçao Investment & Export Promotion Agency (CINEX), a acerca e tema central for di un perspectiva empresarial. E la subraya e desaroyo di habilidadnan empresarial y promocion con-

forme e Strategia Nashonal pa Ekspòrtashon di Kòrsou (NES), cu ta enfoca riba seis pilar economico cu tin como meta un crecimiento anual di 5 porshento di e Producto Interno Bruto (PIB) di pais. Den su presentacion e la enfatisa e importancia di crecimiento economico y e rol di e espirito empresarial den promocion di un mercado laboral inclusivo. Tambe Sra. Bonet a enfatisa e necesidad di miho coordinacion pa fomenta e espirito empresarial. E simposio a brinda participantenan e oportunidad pa hiba discusionnan profundo cu e oradonan tocante asuntonan crucial relaciona cu un mercado laboral inclusivo na Corsou.

Lider di Banco Central Hulandes a bisa cu e interes di ECB por aumenta atrobe



(NLTimes)—Inversornan contando cu e Banco Central Europeo (ECB) no lo aumenta prijs di interes otro siman por a balota e posibilidad di esaki, segun Klaas Knot, e presidente di De Nederlandsche Bank (DNB) y un miembro di e directiva di ECB, a bisa den un entrevista cu

Bloomberg publica ayera.

Aunke a retraso den e economia di e zona Europeo lo contradeci demanda sigur, e proyeccion di inflacion nobo no lo varia mucho compara cu calculacionnan anterior, Knot a declara. Na juli, ECB a aumenta e prijs di interes atrobe pa un cuarto punto di

porcentahe pa 3.75% pa combati inflacion. No tabatin un reunion di prijsnan di interes den augustus.

ECB a aumenta e prijs di interes nuebe biaha tras di otro. Sinembargo, un aumento di un decimo no ta un conclusion, Knot a bisa. E decision di e directiva durante e reunion dia 14 di september no ser un “close call,” segun e presidente d DNB.

E ta kere personalmente cu pa logra e meta di inflacion di 2% pa fin di 2025 ta “e minimo” cu ECB lo mester entrega. “Obviamente mi no lo ta confortabel cu cualkier desaroyo cu por cambia e deadline pa mas laat. Y mi no lo preocupa si e cambia pa

mas trempan,” Knot a bisa.

Na mesun momento, el a adverti contra “demasiado pesimismo” tocante e economia: “Nos ta papiando di debilidad akinan. Nos no ta papiando di un recesion.”

Desde e zomervakantie, hopi hefe di banconan central den e zona Europeo a papia tocante e reunion di ECB e luna aki. E presidentenan di banco centralnan na Alemania, Belgica, Austria y Latvia a hint caba na nan apoyo di un aumenta den prijs di interes. Sinembargo, nan a indic cu esaki por ta ultimo aumenta pa awo. Al contrario, nan ekivalentenan di Italia y Portugal a subraya e riesgonan economico di mas aumenta.

E presidente di banco central na Francia, François Villeroy de Galhau, a bisa den un entrevista ayera cu e prijsnan di interes a casi pik. Sinembargo, e no a specifica si esaki ta nifica cu ECB mester aumenta of mantene e prijs di interes otro siman.

E presidente di e ECB, Christine Lagarde, a enfatisa cu te awo inflacion ainda ta demasiado halto, y banco central ta determina pa reduci esaki na un nivel mas agradabel. E cuestion di prijs di interes lo ser aumenta den e proximo reunion ta depende di e datonan economico disponibel na e momento ey, segun el a splica.

Soldaat Hulandes ta muri durante entrenamiento na kazerne di Schaarsbergen

(NLTimes)—Un soldaat Hulandes a muri durante entrenamiento na e kazerne di Schaarsbergen diamars atardi, segun e Ministerio di Defensa di Holanda a bisa. E soldaat di 31 aña a bira malo na comienso di e ehercicio.

Mediconan a stabilisa e soldaat na e sitio y a hib’e hospi-

tal, unda el a fayece. E causa di su morto no ta conoci ainda. E Marechaussee Real, cual ta un forza policial cu ta traha como parti di e ehército militar, ta investigando e caso aki.

E Ministerio a informa su famia y coleganan. Tambe e instituto gubernal ta ofreciendo asistencia. Segun Om-

roep Gelderland, e homber apenas a cuminsa su entrenamiento na Defensa. Un vocero pa e Ministerio no por a conta nada ainda tocante e historia fisico di e soldaat fayecido. E grupo cu e tabata parti di dje a pasa varios siman cune. E comandante no determina con e grupo lo procede.



Tin chens cu e deadline di 2030 pa reduci emision di nitrogeno lo ser bandona

(NLTimes)—E deadline di 2030 pa corta e emision di nitrogeno pa mita, cual ta un punto significante di contencion den e ultimo añanan, probablemente no lo ser inclui den e ley di nitrogeno. Fuentenan na Den Haag a informa De Telegraaf, cu e minister di nitrogeno demisionario. Christianne van der Wal di VVD, no lo presenta e ley cu e meta di 2030 pa Tweede Kamer.

Actualmente e aña 2035 ta poni den ley como e meta, pero e Gabinete anterior kier a move esaki pa mas trempan. E deadline pa e reduccion di emision di nitrogeno a ser movi for di 2035 pa 2030 den un acuerdo di coalicion entre VVD, D66, CDA y CU. E modificacion aki a ser evalua como un strobacion grandi



pa hopi campesino y provincianan, y semper tabata central den demostracionnan

contra e politica di nitrogeno den e ultimo añanan. E deadline di 2030 a hasta

resulta den un crisis dentro di e coalicion, specialmente despues cu e ex-lider di CDA y Minister Wopke Hoekstra a bisa cu 2030 “no tabata sagrado.” CDA a expresa despues su intencion pa “renegocia” e deadline, enfrentando oposicion fuerte principalmente for di D66, y pa un extento menos, VVD. Sinembargo, e renegociacion nunca a tuma luga.

Christianne van der Wal, e minister responsabel pa e politica di nitrogeno, a bisa prome cu zomer cu e kier a pone 2030 como deadline den e ley, pero varios cos mester tuma luga prome. Su colega Piet Adema (Agricultura) mester a presenta su mesun plan agriculatural despues cu e acuerdo agriculatural a cay den otro. El a plania pa haci esaki e luna aki. Na mesun

momento cu su planan agriculatural, mas negociacion mester tuma luga dentro di e Gabinete pa locual ta e fecha, manera CDA tabata kier.

Mirando cu tur esaki no a procede debi na e caida di e Gabinete na juli, e minister demisionario di nitrogeno a dicidi pa no inclui e deadline den e ley, segun fuentenan a conta De Telegraaf. Ta parce cu e partido di e minister, esta VVD, a rechasa e deadline di 2030 den nan programa di eleccion. Ademas, D66, cual actualmente ta perdiendo popularidad, no ta parce contento pa implementa e deadline di 2030.

Van der Wal posiblemente por entrega su legislacion di Tweede Kamer pidi p’e, pero esaki no ta parce probabel, segun e corant a reporta.

Ciclon ta causa por lo menos 28 morto y 6.000 persona evacua na Brazil

(Euronews) - Tragedia na Brazil, un ciclon extra-tropical a laga atras por lo menos 28 morto y 6.000 persona a ser evacua na estadonan di Rio Grande do Sul y Santa Catarina.

Rio Grande do Sul frontera cu Argentina y Uruguay ta e region di mas afecta cu bi-entonan basta fuerte y inundacionnan den loke a bira e fenomeno climatico mas mortifero den historia di estado di Rio Grande do Sul. Cerca di 60 municipio den region aki a sufrí dañonan como consecuencia di e bi-



entonan fuerte y e gran volumen di awaseronan, cu a aisla comunidannan hente como consecuencia di inundacionnan y riuinan cu a crece, pa loke ekiponan di rescate

mester a interveni. Segun Defensa Civil, e mayoria di e mortonan notifica na Rio Grande do Sul ta di Mucum, na unda e awaseronan a inunda un parti grandi

di e municipio y hopi bisña a keda obliga di bay busca refugio den e dak di nan cas.

E cifra di fayecidonan por subi den proximo oranan debi cu ayera diaranson e nivel di awa a cuminsa baha, kitando e posibilidad na servicicionan di rescate na algun zona afecta.

E prioridad te ayera, segun autoridannan, tabata “pa rescata” e famianan cu a keda sin comunicacion, pa lo cual nan a involucra centenares di efectivo di Defensa Civil, Cuerpo di Bombero, Forsa Arma y gruponan di boluntarianan.

E presidente Brasileño Luiz Inacio Lula da Silva diamars ultimo a expresa su solidaridad cu e famianan afecta y a priminti “haci tur lo posibel pa yuda e poblacion” pa supera e momento aki.

Luna di juni ultimo e mesun estado di Rio Grande do Sul tambe a ser afecta pa otro ciclon cu a laga 13 morto.

E clima di Brazil ta sigui causando desasternan, mientras algun estadonan ta haya awasero y inundacionnan, na ciudadnan como Sao Paulo ta enfrenta calor extremo di temperaturanan mayor na 30 grado.

Gobierno Colombiano y ELN ta defini “areanan critico” pa accionnan humanitario

(RFI) - E di cuatro ciclo di negociacion entre Ehercito di Liberacion Nacional (ELN) y Gobierno di Colombia a caba cu e boluntad di realiza accionnan humanitario den e zona na unda guerra ta afecta hopi mas e comunidannan.

Ehercito di Liberacion Nacional (ELN) y Gobierno di Gustavo Petro despues di cuatro siman di negociacion na Caracas, Venezuela, dialuna 4 di september a anuncia un acuerdo cu ta spera beneficia e bida di e comunidannan. Te avor e areanan estableci ta ubica un na west, otro na costa pacifico Colombiano, departamentonan di Choco y Valle del Cauca y otro na

noordwest di e pais, entre departamento di Antioquia y sur di departamento di Bolivar.

Den e dos luga aki ya caba a realiza caravananan humanitario, cu e fin di recolecta informacion pa planifica y diseña acuerdonan pa alivia e impacto di e guerra den poblacionnan.

Segun representantenan di ELN y Gobierno Colombiano, e puntonan aki ta bay ricibi ayudo humanitario, proyectonan di desaroyo social priorisa y e posibilidad di participacion den iniciativa- nan di paz.

Ivan Cepeda, senador di republica y integrante di ekipo negociado di Gobierno, a sigura cu “e idea ta cu den e dos zona aki lo adelanta accionnan

y dinamica humanitario, garantianan pa cumplimiento di stop al fuego bilateral, nacional y temporal, participacion di comunidannan den proceso di paz y proyectonan di desaroyo social.”

Cepeda tambe a bisa cu e obhetivo tambe ta pa inclui e prizonnan di e pais como parti di e areanan critico aki pa desaroyo di mecanismonan concreto pa atende e presonan politico.

“Den acuerdonan cu nos a yama di Caracas, nos a pone enfasis pa atende e areanan critico, pakico? Pasobra ta na unda e comunidannan mas a keda afecta”: di e forma aki e hefe di delegacion di guerrilla den negociacionnan di paz Pablo Beltran, a anuncia e creacion di e areanan deno-



mina como critico. Beltran a probecha pa nenga un bes mas e acusacion haci pa e fiscal Francisco Barbosa e luna pasa, cu e guerrilla aki ta planea un atentado den su contra: “Di manera hopi intenso, a haci un campaña

mediatico, buscando pa pone obstaculonan na e proceso aki.” el a bisa.

E acuerdonan ta tuma luga un luna despues cu a cuminsa e halto al fuego bilateral di seis luna entre ambos parti.

Presidente Peruano a cambia 6 minister di su gabinete pa di dos

(Reuters) - Presidente di Peru, Dina Boluarte, diaranson ultimo a cambia seis di su ministernan, den un segundo modificacion parcial di su gabinete den transcurso di su gobierno cu no a inclui e cartera di Economia ni di Energia y Mina.

Entre e cambionan ta figura e minister di Educacion, Magnet Marquez, ken e siman aki a mostra su oposicion na un ley di Congreso sigurando cu ta afecta “meritocracia” debi cu tambe ta propone e reincorporacion di maestronan publico cu a ser kita for di nan trabou.

Tambe a kita for di nan funcion e ministernan di Husticia, Transporte, Labor, Produccion y Desaroyo Agrario.



Boluarte a asumi e poder na september 2022 ora e man-

datario iskiardista Pedro Castillo a keda destitui pa purba

disolve Congreso y asina reorganisa e poder hudicial.

Boluarte tabata e vice-presidente di Castillo.

E rotacion di ministernan ta constante den e segundo pais productor di koper na nivel mundial, cu na comienso di aña a biba un ola di protestan den cual tabata pidi eleccion anticipa y e renuncia di Boluarte, hechonan cu a laga decenas di morto y centenares di persona herido.

E ministernan nobo a hura nan funcion na Palacio di Gobierno den un ceremonia transmiti via television.

E ultimo cambio importante a realiza na april, cu cuatro minister. E gabinete Peruano ta conforma pa 19 minister, incluyendo e hefe di ekipo di Gobierno.

Cuba: Canada ta adverti turistanan riba escasez di articulonan di prome necesidad na Cuba

(CiberCuba) - E gobierno di Canada a adverti na su ciudadanonan cu ta desea di biaha pa Cuba tocante e escasez di articulonan di prome necesidad cu tin na e isla Caribense.

Den un comunicado, e gobierno di Canada a pidi su ciudadanonan pa nan tin precaucion extremo ya cu na Cuba tin falta di alimento, medicina y combustibel.

“Cuba ta enfrenta un escasez cronico y grave di articulonan di prome necesidad, entre nan: alimento, awa den boter, medicamento, combustibel y moneda fuerte,” e texto ta bisa.

E documento ta remarca cu e escasez di combustibel ta critico y ta afecta un grupo grandi di servicio, no solamente e transport, si no tambe e funcionamiento di e hotelnan y e pomp stacionnan, unda filanan largo ta wordo produci.



“E servicionan di transporte publico, incluyendo taxinan, hopi biaha ta wordo interumpi, loke ta laga e turistanan cu poco opcion pa biaha. Algun di e biaheronan a keda temporalmente sin gasolin cu autonan di huur. Ta posibel cu e hotel- y complehonan turistico, cu hopi biaha ta usa generador durante e blackoutnan, no por mantene nan servicionan,” e ta detaya.

Como consecuencia, ta conseha e turistanan pa hiba cu nan articulonan di higiena y medicamento, y pa tene disponibel un suministro di awa, alimento y combustibel y un kit di emergencia completo.

Canada ta mantene ademas e advertencianan pa peliger di hortamento, agresion, fraude, estafa, prijsnan falso di e taxi-

nan, blackouts, acoso sexual na e muhenan, camindanan insegur, droga den bebidanan y mal conexion di internet.

Durante algun aña Canada tabata e pais principal pa turismo na e isla, pero e cifranan ey a baha debi na e insatisfaccion pa e servicionan cu nan ta ricibi.

Den luna di juni, turistanan

Canades cu tabata di vakantie na Cayo Santa Maria y cu nan avion a sufri un daño, a denuncia cu e hotel unda nan a manda nan te ora cu nan por a bay back nan pais tabatin condicionnan di salubridad pesimo: e tabata sushi, sin awa y cu insectonan, haraña y colebra den e cambenan.

E escasez di productonan basico y e aumento di inseguridad ta algun di e motibonan door di cual no mester biaha pa Cuba, unda cu ademas hopi di e hotelnan ta den ruina, e servicionan di huur turistico ta di e peor calidad y e ciudad- y pueblonan ta destrui, unda cu ambientenan peligroso ta prospera y cu peliger cu e edificionan por derumba.

Na juli ultimo, e gobernante Miguel Diaz-Canel a admiti cu e pais no lo logra e 3.5 miyon di turista internacional cu e tabata spera di ricibi e aña aki, un golpi duro pa e intentonan di mitiga e crisis economico.

Venezuela: Crisis y migracion ta influi den e aumento di abuso sexual infantil na Venezuela

(ElNacional) - Venezuela ta registra un aumento di casonan di abuso sexual infantil. E migracion, cu a hiba miles di persona na laga nan yiunan atras bao cuido di un tercera persona, y e falta di lesnan na scolnan publico, ta entre e causanan principal di e aumento aki.

Den algun di e casonan, segun expertonan, e abusanan ta tuma luga incluso cu e consentimiento di e cuidado, desespera pa ricibi un pago den alimento of placa cash.

Un total di 5,519 denuncia di abuso sexual infantil a wordo reporta den 2022, 29% mas cu e aña anterior, segun datonan oficial. Di e total, 2,311 a wordo inculpa y 1,013 a wordo condena.

Den e ultimo decada tin 17 mil acusacion y 5.196 condena.

Un rapport di e ONG Una Ventana de la Libertad

(UVL) ta revela cu e delito di maltrato infantil ta un di e seis causanan principal di ingreso den prizon.

Alrededor di 10 di e mas di 30 miyon di habitante cu Venezuela tin ta mucha y hoben, segun UNICEF.

Expertonan ta coincide cu e abuso infantil ta tuma luga mas facil ora cu hobennan ta haya nan mes den situacionnan di vulnerabilidad.

Migracion ta un ehempel cla. Hobennan cu ta keda bao cuido di nan welo, bisiña, omo/tanta of familiar cercano pasobra e mayor of responsabelnan directo a bandona e pais door di e crisis economico, e criminologa Magally Huggins ta splica.

“Nan ta nan so mas hopi, expuesto na violencia y akinan ta unda e abuso ta drenta, e problema cultural aki aworaki den aumento,” Huggins ta alerta.

Otro rason e criminologa ta agrega, ta e crisis den e sistema educativo. “E scolnan publico no ta funciona, si no un of dos dia pa siman,” el a bisa, y debi na e salarionan abao e profesornan a reduci nan orario di trabao. Y hopi hoben ta keda e ora sin niun cuido.

E Red pa Derechonan Humano di mucha y hobennan (Redhna) ta denuncia tambe casonan den cual e mayornan ta permiti e abuso pa haya placa of cuminsa como un medida di sobrevivencia na e crisis economico.

“Esaki nos ta wak e di berdad cu hopi frecuencia,” e trahado social Angeyeimar Gil, investigado di Redhna cu ta sigui e situacion di derechonan di mucha a traves di denuncianan registra den prensa, a sostene.

E fiscal general Tarek William Saab ta bisa cu e proyecto ‘Pedofilia es Crimen’ lansa den 2021, a per-



miti pa e hendenan perde miedo na haci denuncia. “El a logra cu personanan cu nos no tabata sa ta victima of cu tabatin miedo ta haci denuncia y obviamente e casonan aki no ta prescribi.”

Sin embargo un ex polis, mama di un mucha muhe cu presuntamente a wordo abusa pa su tata, tambe funcionario, ta reclama un retraso serio den e proceso. E muhe ta bisa cu despues di haci e denuncia el a wordo presiona y mester a renun-

cia. “Ami ta wak cu nan ta bisa: Tin campaña, si haci denuncia, papia, pero esey tabata e delito cu ami a comete, haci e denuncia, papia,” el a remarca.

Child Rights International Network, un red cu ta apoya e Convencion di Nacionnan Uni tocante Derechonan di Mucha a denuncia cu Venezuela ta e di dos pais di Latino America cu menos medida pa prevencion contra abuso sexual infantil.

Bishita di Rey Charles III na Francia ta bay inclui cena estatal na Versailles y parada na Bordeaux

(AP) — Rey Britanico, Charles III ta bay biaha pa Francia e luna aki pa un bishita estatal cu a keda posponi na maart pa motibo di miedo cu e manifestantenan protestando contra politicanan economico di presidente Emanuel Macron lo interumpi e actonan protocolario.

Charles y Reina Camilla ta bay bishita Paris y Bordeaux entre dia 20 pa 22 di september, segun Palacio di Buckingham a anuncia ayera. E bishita ta subraya e meta di Reino Uni pa reforsa lasonan



cu su bisiña Europeo mas cercano despues di añanan di relacionnan tin biaha tenso, afecta pa Brexit y desacuerdo tocante e cantidad di migran-

te crusando e Canal Ingles riba botonan chikito. “E bishita estatal ta bay celebra e relacion di Reino Uni cu Francia, marcando

nos historia, cultura y balornan comparti,” segun Chris Fitzgerald, secretario priva interino di e rey.

Mientras cu e famia real Britanico hopi tempo atras a concede poder politico na e lidernan electo di e pais, nan ta keda como e embahadornan pre-eminente di Reino Uni cu presidente y prome ministernan buscando pa baña den e glamour y espectáculo cu nan ta trece unda cu nan bay.

E rey tabatin intencion pa haci Francia e escena di su prome bishita di ultramar den tributo na su relacion cercano

cu Macron, basa riba nan enfoque comparti riba proteccion di medio ambiente y combati cambio climatico. E honor ey a bay pa Alemania ora cu Charles a cancela e prome parti di su tour Europeo di dos nacion na momento cu protestanan contra e plan di Macron pa aumenta edad di retiro a desemboca den disturbio.

Pero oficialnan na ambos banda di e canal tin speranza cu e retraso lo haci posibel pa tene e espectáculo y ceremonia di un bishita estatal den spirito di celebracion.

Joe Jonas ta pidi divorcio di Sophie Turner despues di cuatro aña di matrimonio

(AP) — Joe Jonas a entrega documentonan di divorcio pa Sophie Turner diamars despues di cuatro aña di matrimonio y dos yiu. E cantante di Jonas Brothers, di 34 aña di edad, a entrega e documentonan pa caba cu su matrimonio cu e actriz di 27 aña di edad, strea di Game of Thrones, na Corte na Florida.

E documentonan ta bisa cu “e matrimonio entre e partidonan ta kibra irreparablemente.”

Turner y Jonas a casa den un ceremonia secreto na un kapel na Las Vegas dia 1 di mei 2019, despues di e Billboard Music Awards. Duo Country, Dan + Shay a haci un presentacion na e boda. E

pareha a haya un yiu muhe, Willa na 2020, y aña pasa a haya un otro yiu muhe kende su nomber nan no a revela publicamente. Jonas ta buscando custodia comparti di e muchanan, segun e documentonan di divorcio. E pareha tabatin un acuerdo pre-nupcial cual Jonas ta spera ta bay cumpli.

Representantenan di Jonas y Turner no a responde inmediatamente pa solicitudnan di comentario.

Ayera, sinembargo, Turner y Jonas cada un a post declaracionnan identico riba nan cuenta di Instagram. “Despues di cuatro aña maravioso di matrimonio nos a dicidi mutuamente pa di manera amigable termina nos matri-

monio,” e declaracion ta bisa. “Tin hopi narrativa especulativo riba pakico, pero realmente esaki ta un decision uni y nos ta spera sinceramente cu tur persona por respecta nos deseo pa privacidad pa nos y nos yiunan.”

E pareha a bisa den entrevistanan cu amigonan mutuo pa largo tabata kier presenta nan na otro tempo cu nan a cuminsa papia riba mensahe directo di Instagram na 2016. Nan a conoce en persona na october di e aña ey, y a cuminsa sali cu otro exclusivamente na december. Nan a anuncia nan compromiso na october 2017.

Turner, kende ta bin di Northampton, Inglatera, a interpreta Sansa Stark den



ocho temporada di Game of Thrones riba HBO y tambe Jean Grey den e pelicula di 2016, X-Men: Apocalypse y di 2019, Dark Phoenix.

Jonas, naci na Arizona, a bira

famoso cu su rumannan Nick y Kevin den un banda cuminsando na 2005 y un serie riba Disney Channel. Nan a lansa nan di seis album na mei, y actualmente ta den un tour di stadion na Merca.

Jungkook di BTS ta uni Global Citizen Festival den un di su prome presentacionnan solo na Merca

(AP) — Jungkook di BTS ta bay uni e Global Citizen Festival, haciendo un di su prome presentacionnan solo en bibo na e concierto dia 23 di september na Central Park na New York.

E cantante di K-pop, kende su single di debut solo, “Seven” a alcanza No.1 na Merca y rond mundo e berano aki, ta bay uni na Red Hot Chili Peppers, Ms. Lauryn Hill, Anitta y Megan Thee Stallion como headliner di e evento diseña pa curasha sostenedornan, specialmente esnan den



Gen Z, pa tuma accion contra pobreza extremo, desigualdad di genero, cambio climatico y otro problema.

“E festival ta briya un luz riba

causanan importante y ta impulsa accion y mi ta contento di ta parti di dje,” Jungkook a bisa den un declaracion. “Mi no por warda pa presenta dilanti asina hopi hende na e

Great Lawn na Central Park.”

E Global Citizen Festival - cual tambe ta bay inclui presentacionnan di sensasion di K-pop Stray Kids, compositor-cantante Conan Gray, rapper-DJ D-Nice, y actor-cantante Sofia Carson - ta duna ticket gratis na e evento a cambio di fanaticonan tumando accion pa cambio social riba e app y website di e grupo.

Sostenedoran di Global Citizen ta urgi gobiernonan pa tuma accion pa adresa pobreza extremo y e problemanan

sistematico cu ta tene miyones di persona den pobreza. Oradornan variando desde Bill Nye the Science Guy te rapper Common, personahe di television Padma Lakshmi te strea di basketball Carmelo Anthony, y cantidad di defensor for di henter mundo tambe ta bay t’ey pa curasha publico pa tuma accionnan adicional.

Ta bay transmiti e festival en bibo riba website di Global Citizen y cantidad di otro plataforma incluyendo Prime Video di Amazon, Apple TV, Hulu, Instagram, TikTok y

Un grupo grandi ta logra un capitulo nobo den nan carrera policial

62 polis a haya nan diploma

Den un sala completamente yen famia y coleganan a bini hunto pa entregamento di diploma na 62 Agente policial. Un grupo grandi di polis parti den diferente klas a haya nan diploma den presencia di Minister di Enseñansa y deporte Sr. Endy Croes, altcomisario di polis drs. Ramon Arnhem y hefe di Scol di Polis E.J. Watty Vos.

E agente policial cu a haya nan diploma tabata parti den diferente klas y funcion cono manera: entrega di diploma Basico di Polis, a termina nan estudio policial nivel cuater di MBO y a termina estudio policial di Hoger Kader

Opleiding (HKO).

E prome klas cu a ricibi nan diploma basico di polis ta studiantenan di aña 2021. Nan ta studiantenan cu ainda ta den proceso cu nan estudio policial, awor aki a termina nan prome dos aña y ainda falta dos aña mas pa sigui studia.

Studiantenan di klas 2019 a termina nan estudio policial MBO nivel cuater cu exito. Aruba ta haya polisnan hoben, dinamico cla pa subi caya y sirbi Pais Aruba dignamente.

Tambe e ultimo grupo di polis cu a haya nan diploma ta e klas cu a termina estudio policial di Hoger Kader

Opleiding. Esaki nifica Cuerpo Policial Aruba a crea lidernan nobo pa sigui guia e cuerpo pa e futuro generacion. Esakinan ta e polis cu lo carga e futuro di nos cuerpo dor di guia e hobennan di nos cuerpo pero tambe pa hisa e calidad di KPA.

Pa altcomisario di polis drs. Ramon Arnhem e ta mira bek cu orguyo cu tres diferente klas ta haya nan diploma. Tres diferente klas cu hoben y profesional cla pa haci un cambio pa e organizacion. Cada momento ta uno special pero esaki ta e momento cu famia a presencia un capitulo nobo di nan ser ker, alabes nunca un polis ta caba di studia pero ta sigui amplia nan



conocemento pa por brinda un mihor servicio na nos comunidad. Pa den futuro nos por mira bek e simia cu nos a planta a crece y cosecha fruta pa e siguiente generacion.

Masha pabien na tur 62 agentenan cu a ricibi nan diploma

y ta cla pa un etapa nobo den nan carera policial. Tambe nos kier felicita cada un famia di e agentenan pa nan sosten brinda na cada un polis. E tarea cu nan tin no ta facil sin e sosten fuerte di nan famia. Hopi exito y sigui brinda lo mihor pa Pais Aruba.

Encuentro di adulto mayor na Fundacion Famia Piedra Plat

Diasabra 2 september 2023, directiva di FFPP a ofrece un desayuno y charla na masomenos 55 adulto mayor di 60+ di e bario di Piedra Plat y vecindario y algun otro invitado.

Chefkok Soraya cu ayudo di algun voluntario a prepara un desayuno saludabel pa esnan presente, mientras señor Roberto Croes a duna un charla

hopi intresante tocante e historia di e bario di Piedra Plat.

Cu hopi interes tur hende a sigui e charla y a participa despues na un quiz cortico y e 3 ganadornan a risibi un regalo. Na final a haci un encuesta y tur e adultonan mayor di 60+ a indica cu nan lo aprecia pa FCFPP sigui cu e encuentronan aki y a bisa kico nan lo desea pa tin den e

encuentronan.

Un danki ta bay na tur e boluntarionan y na CEDE Aruba cu ta sostene y guia diferente proyectonan den bario atraves di e proyecto "Barionan Unico"

Directiva di Fundacion Centro Famia Piedra Plat a keda hopi contento di mira e grupo di 60+ aki cu asina hopi



entusiasmo y nan a gradici directiva hopi pa con e pro-

grama tawata hinca den otro y cu nan a gosa di e mainta.



eforea
SPA
HILTON ARUBA

RETROGRADE RITUAL

JOIN US FOR

Sound Bowl Meditation at the Beach

September 8 & 15, 2023 | 6:30pm | eforea Beach

Mindful meditation can reduce stress, anxiety and a wandering mind and when it comes to Retrograde, it is crucial to keep the mind focused. This mindful meditation and sound healing session will help you do this.

NO RESERVATIONS NEEDED
FOR MORE INFORMATION PLEASE CONTACT:
AUAAH_EFOREA_ARUBA@HILTON.COM


Opinion ta un seccion di **Bon Dia Aruba** specialmente pa brinda oportunidad na lectoran individual pa expone nan opinion. Contenido publica di ningun manera ta refleha opinion di **Bon Dia Aruba** y ta pa responsabilidad exclusivo di e organizacion/individuo cu ta ofrece esaki pa publicacion. **Bon Dia Aruba** ta reserva e derecho di no publica texto ofreci, si esaki segun e medio no ta cuadra cu e normanan di decencia cu nos ta mantene, pa evita contenido cu ta innecesariamente ofensivo. Esaki suheto na evaluacion exclusivo di **Bon Dia Aruba**.

OPINION



Skirbi pa Robert Arends

Cu presupuesto aproba so, por gasta!



E sistema di Gobierno pa paga pa servicio y producto, despues cu Gobierno di Aruba tin su presupuesto aproba pa Parlamento, ta un principio cu Go-

bierno mes mester aplica tambe ora financia servicionan privatisa y fundacionnan subsidia.

Gobierno mester (tin un control =) aproba adelanta presupuesto y proyecto nan financia/subsidia pa Gobierno. No por permiti mas pa servicionan privatisa y pa fundacionnan subsidia haci gastonan extra sin aprobacion adelanta di Gobierno.

Placa di pueblo mester worde

gasta di forma responsabel, mescos cu Parlamento ta exige di Gobierno.

Pa loke ta entradanan di pais Aruba : tur entrada di pais Aruba mester worde cobra pa Gobierno y no pa servicionan privatisa of otro instancia. Di e placanan cobra Gobierno ta financia/subsidia e servicionan y fundacionnan segun nan begroting/proyecto aproba pa Gobierno.

E actual maneho (di complace/privilegia) ora di pri-

vatisa y ora di duna subsidio, ta costa pueblo demasiado placa, loke ta haci cu Gobierno mester cobra pueblo, di forma exagera, mas belasting of mester hisa tarifanan pa pueblo of crea mas debe.

CONCLUSION : Gobierno mes mester cobra tur entrada di pais Aruba y Gobierno mester duna aprobacion prome cu por gasta!

Pa pensa ariba sin miedo!

Skirbi pa Robert Arends

DIMP y cuenta di banco di contribuyente

Ora lesa den prensa local cu DIMP (= Departamento di Impuesto) ta relata cu tin compania/negoshi cu ta manda bisa DIMP cuanto nan mester paga na "bbo", pero

- segun DIMP - nan no ta paga loke nan mes a declara.

Anto e pregunta ta : dicon DIMP no tin apoderacion di e contribuyente nan pa

DIMP mes laga kita e placa di cuenta bancario di e contribuyente ?

Ta un forma masha usual (puntra SETAR) pa cobra aki na Aruba, ademas DIMP ta



pidiendo y mester tin cuenta bancario di e contribuyente nan caba! Ta un sistema cu DIMP por aplica facil cu tur

sorto di impuesto y areglo di pago.

Pa facilita compliance!

Skirbi pa Milton Ponson

Recordar es vivir!



Ta Ursell Arends a cuminsa lubida caba cu e a ENFATIZA cu mester pone moratorium y stop IberoStar, Secrets, Hyatt Place, Embassy Suites etc.!!!!???

Y awor no ta ni hik riba tema di Secrets Resort cu lo caba cu islanan di bubi cu ta area proteha den Parke Nacional Aruba y na unda FPNA tambe ta kedando keto keto. Pero loke ta mas tristo di tur ta cu presidente di Aruba Birdlife Conservation, esta Greg Peterson tambe ta kedando

keto keto riba Secrets Resort y islanan di bubi y Peterson ta consehero tras di cortina di Ursell Arends.

Wak con Greg Peterson a gaña cu ela logra para tur desaroyo pabou di Bubaliplas den corte na 2016.

Awe 2023 FULL e strip pabou di Bubaliplas ta yena cu highrise resorts y Greg a hiba ningun desaroyo di hotel corte mas pa stop esakinan. Mescos cu e no a haci NINGUN caso den corte pa para Secrets Resort pa salba e islanan di

bubi. E cu Ursell Arends y FPNA por duna otro man pa no haci nada efectivamente pa salba islanan di bubi y forza e moratorium proponi dor di RAIZ mes, ariba conseho di Aruba Birdlife Conservation na 2018.

Caso di "Money talks, bullshit walks" tin aki? Paso-bra otro splicacion drechi no tin!!!

Ata e mentira di 2016: "Op 11 juli maakte Vogelbescherming een klinkend succes van de Arubaanse collega's bekend. Zij kregen van de rechter gelijk; in de randzone van het Belangrijke Vogelgebied Bubali-wetlands mogen geen illegale bouwactiviteiten worden gedoogd. Op straffe van een dwangsom moet de natuur ter plaatse hersteld worden.

Het parlement van Aruba staat unaniem achter de natuurbeschermers en wil dat zestien kwetsbare natuurgebieden – waaronder enkele belangrijke vogelgebieden – worden toegevoegd aan het Nationale Park Arikok. Daar-

mee is de bescherming beter gegarandeerd.

De regering van Aruba wil echter de vrijheid hebben die gebieden desgewenst ook voor andere doeleinden te kunnen 'ontwikkelen' (lees: bebouwen). In reactie op de rechtelijke uitspraak wil men nu het Ruimtelijke Ontwikkelingsplan van Aruba open

breken en de beschermde status van verschillende gebieden verkleinen of op heffen. Aruba BirdLife Conservation heeft nieuwe rechtszaken aangekondigd en is een handtekeningactie begonnen. Die moet het kabinet duidelijk maken dat het de wens van het parlement dient te respecteren."

MEDIO AMBIENTE URSSELL ARENDS

Moratorium urgente of despedida di Aruba

R. By Ursell Arends 27 August 2018

Durante e ultimo simanann RAIZ a tuma nota cu e topico di mas cambes di hotel aha nos isla ta ganando mas y mas atencion. Gran parti di nos pueblo (87%) durante 2016 caba a duna di conoce cu nan no ta sostene e idea pa expande e producto hotelero di nos isla. Durante e luna di april ultimo, RAIZ a publica un articulo titra "24 mil hende mas na Aruba pa 2020" caminda nos a conseha y recomenda un moratorium anha desaroyo di proyectonan nobo di hotel y condominio.

Aunke gran parti di nos comunidad ta consciente cu no tin necesidad pa construi mas hotel ni condominio pa empulsa nos economia, ta parce cu nos gobiernanten ainda no ta realisa e consecuencianan di nan ignorancia. Cu tanto proyecto bato bir bou di construccio y un parada di proyecto nobo na caminda, pueblo por sigui reficera su disgusto y preocupacionnan te ora nan temenan bisa realidad.

Pa duna un bista cla di e realidad aki, RAIZ ta refici na e siguiente proyectonan:

Dos hotel nobo bou di construccio:

A logra haya auto horta un rato prome y a core na pia tras di e ladron y a logra gar'e

Diamars merdia a drenta informe di cu a logra localisa un auto horta un rato prome y tin e sospechoso wanta banda di postkantoor na Oranjestad, pero un rato despues esaki logra scapa core bay zuid.

A duna e descripcion con e sospechoso ta bisti y a logra topa cun'e na altura di doña Clara unda eynan mes polis a logra detene. Mientras e auto a ser confisca pa mas investigacion.




Candela bao afdak na un cas den Rondweg



Diaranson mainta a drenta informe di un candela na Rondweg. Mesora a dirigi tanto polis como brandweer na e sitio.

Na yegada di e patruya a bin compronde cu ta trata di un candela patras di un cas bao afdak unda un soda a kima completamente. Na yegada di e brandweer mesora nan a combati e candela aki. Polis a tuma datos di e sucedido aki.

Cas na candela den Tamarijnstraat



Diaranson mainta a drenta informe di un cas na candela na Tamarijnstraat. Mesora a dirigi tan-

to polis como brandweer na e sitio.

Na yegada di e patruya a bin

compronde cu un cas cu personanan no ta biba aden lo ta na candela y ta saca masha hopi huma. Na yegada di e

brandweer mesora nan a bai combati e candela. Polis a bay controla den e area ya cu esaki ta e di dos candela den

e area, y ta supone cu porta un persona lo ta cendiendo e candelanan aki.

Polis a touw auto cu a ser laga pa su cuenta riba caminda na Palm Beach

Diaranson madruga durante patruya na e hotzone banda di e hotelnan highrise na Palm Beach polis a nota un obstaculacion di trafico riba caminda.

Ora a yega cerca a nota cu ta un auto a ser laga atras pa su cuenta. Mesora a solicita un takelwagen pa kita e auto aki cu ta strobando e fluho di trafico.



Mayoria residente di Hulanda ta convenci cu nan por descifra informacion falso pero ta preocupa pa otronan

(NLTimes) - Varios persona Hulandes ta kere cu otronan ta haya dificultad pa trata cu mal informacion cu mira online. Un investigacion conduci pa Social and Cultural Planning Office (SCP) a revela cu 48 porciento di e residentenan di Hulanda ta preocupa pa e impacto di mal informacion online, mas di un tercer kwart ta kere cu nan por descifra informacion incorrecto of falso online.

Segun e reportahe, personanan hopi biaha no ta verifica e informacion cu nan ta mira online, citando e “tempo y esfuerso” cu esaki ta rekeri. Tambe tin un nivel di preo-

cupacion tocante e rol potencial di inteligencia artificial den ambos detecta of plama informacion falso. Un mayoria chikito di e personanan cu a participa den e encuesta ta na fabor di limita libertad di expresion pa contraresta contenido dañino.

E reportahe aki tambe ta enfatisa e preocupacionnan tocante comportamiento online, cu e personanan preocupa cu insultonan, menasanan y mensahenan di odio cu por tin consecuencianan den bida real. Hopi ta duna sosten den implementa medidanan pa contraresta e tipo di mensahenan aki.

Riba e topiconan di politica,



SCP a haya cu mas di mita di e personanan cu a participa ta kere cu Hulanda ta riba e caminda incorrecto. Confiansa den ambos e Gabinete y Tweede Kamer, parti di Par-

lamento Hulandes, ta hopi abao. E confiansa den politica Europeo tambe ta abao. Sinembargo, mayoria di nan ta spera pa Hulanda permanece den e Union Europeo. Un

poco mas cu e mita a expresa sosten pa Ucrania su ingreso na Union Europeo, siempre y cuando e pais cumpli cu e criterio necesario.

Politiconan Hulandes ta adverti tocante menasa di AI den speechnan di apertura di aña academico

(NLTimes) - Ora cu e aña academico a cuminsa den educacion halto na Hulanda, varios politico a dirigi na e studiantenan durante ceremonianan di apertura, enfatisando e dañonan potencial di desaroyonan di inteligencia artificial si no mantene un bista riba esaki.

“Ta trata hendenan cu ta crea un sociedad,” e Minister di asuntonan social y empleo Karien van Gennip a remarca na e apertura di aña academico na Delft University of Technology. E Minister di CDA a enfatisa na studiantenan cu e desaroyonan tecnologico manera inteligencia artificial, ta trece preguntanan cu tin mester di e conocimiento di tecniconan. El a enfatisa tambe e punto aki pa medio di referencia un declaracion di e filosofo Plato, advirtiendole e studiantenan di e riesgonan cu por potencialmente empodera e personanan cu tin mal intencionnan.

Aña pasa, e introduccion di e chatbot ChatGPT a causa un discusion amplio tocante e oportunidadnan y peligrnan di inteligencia artificial den universidatnan Hulandes. E topico tabata e tema principal di Delft University su ceremonia di apertura anual. Van Gennip a argumenta cu solamente un gobierno fuerte por sigura e realizacion di e oportunidadnan aki sin cu ta



ignora e elemento humano y preocupacionnan etico.

El a cita tambe e ehempel di un pakete cu por keda entrega rapidamente despues di un buskeda simpel riba Google, cual el a categorisa como “ingenioso”. Sinembargo, tambe el a nota cu tras di e beneficio aki por tin “un mundo di abuso, division y oportunidadnan cu no ta igual,” caracteriza pa trabaonan di salario minimo cu hopi biaha ta ocupa pa individuonan vulnerabel.

Van Gennip a expresa speransa cu e studiantenan lo tuma e preguntanan aki na cuenta. Por ehempel, cua tareanan por keda delega na robotnan y con e futuro di e economia y mercado di labor den fu-

turo mester ta. El a enfatisa e necesidad di incorpora elemento humano den tur e desaroyonan aki.

Den un sentir similar, Minister di Educacion Robbert Dijkgraaf a duna un speech na University of Twente, y el a enfatisa e rol critico di intervencion di ser humano den AI, declarando cu “ningun chatbot por iguala creatividad y resiliencia.” Tambe el a boga mas enfasis riba e habilidadnan aki dentro di e esfera di educacion, potencialmente integrando esaki den curso-

nan di ciudadania. Alexandra van Huffelen, e secretario di estado encarga cu digitalisacion na Hulanda, tambe a enfatisa e oportunidadnan y riesgonan asocia cu

AI. Aunke Hulanda ta hayando cada biaha mas control riba e “AI ordinario,” e ta considera AI generativo, cual ta crea imagennan of texto, ta un desafio “hopi mas grandi. Nos mester responde di manera grandi y cu hopi sabiduria,” Van Huffelen a urgi, haciendo yamado pa un strategia uni di parti di Nacionnan Uni.

Tambe el a trece dilanti com importante e ta pa mira e impactonan riba e sociedad di e tecnologia aki y pa proteha “nos balornan publico” ora di usa AI generativo. El a señala e peliger di stereotiponan y prehuicio cu AI por crea, ilustrando esaki cu e ehempel di ilustra un hende muhe di color scur como un emplea-

do di limpiesa den contenido genera pa AI.

“Si nos no combati e riesgonan aki, nos ta conscientemente somete nos mes na e compania di mas o menos 4 pa 5 hende homber, cu genuinamente ta kere cu nan biyones ta compove cu nan sa kico ta bon pa mundo,” e secretaria a declara.

Van Huffelen a sugeri cu confronta e desafionan di AI ta rekeri esfuersonan for di educacion, ciencia y negoshinan.

El a propone establece un centro internacional dedica na investiga, test y regula AI. “Mi ta kere cu Hulanda ta un luga designa pa un centro como esaki,” el a splica.

Den aña 2024 ta “recap” e pista di International Raceway Park Palo Marga

Recientemente, Minister di Enseñansa y Deporte Endy Croes tabata presente na Palo Marga International Raceway Park, unda cu tabatin careda di One Cool Summer Nationals 2023 tumando luga. Tabatin un publico grandi presente cu a disfruta di cada careda riba e pista di Palo Marga.

Durante e evento aki, organisadonan a reconoce tres baluarte cu a traha hopi duro pa e deporte di drag race na Aruba, esta Sr. Manuel da Silva, Sra. Miriam Wouters y Sra. Kedy Koolman. Minister Endy Croes tabatin e honor pa haci entrega di e reconoce-

mento na e baluartenan di e deporte di drag race. Presente tambe na e ocasion aki, tabata e baluarte Sr. Andre Wernet y e legendario Sr. Henny Leo kende a hiba palabra durante e ceremonia. E aña aki Palo Marga International Raceway Park a cumpli 40 aña di existencia. Minister Endy Croes a indica cu a logra drecha 26 poste di luz na Palo Marga y a compromete cu pa aña 2024 lo “recap” e pista completamente pa asina cumpli cu standard internacional. Pa finalisa, Minister Endy Croes a desea tur coredo hopi exito. Alabes a felicita organisadonan y One Cool Summer Nationals 2023 cu un tremendo y exitoso evento.



Hungado di futbol Spaño Jenni Hermoso ta acusa Luis Rubiales di asalto sexual pa e sunchi durante Copa Mundial

(AP)—Hungado di team nacional di Spaña, Jenni Hermoso, a acusa Luis Rubiales di asalto sexual relata na e sunchi cu el a dun’e sin permiso despues di e final di Copa Mundial Femenino, segun e fiscal di e pais a informa ayera.

Rubiales, ken awo ta suspendi di su rol como presidente di e federacion di futbol Spaño, a sunchi Hermoso durante e ceremonia di premio despues cu Spaña a gana titulo mundial dia 20 di augustus na Sydney, Australia. Rubiales a keda insisti cu e sunchi tabata consensual,

pero Hermoso a rechasa e declaracion aki. Tambe el a bisa cu e, como tambe su famia, a ser presiona pa muestra apoyo na Rubiales despues di e incidente cu a stroba e celebracion di e team nacional. E oficina di fiscal na Madrid a declara cu, segun un ley di consenso sexual cu a ser implementa aña pasa, Rubiales por enfrenta un boet of sentencia di prizon di 1 pa 4 aña si e ta culpabel. E ley nobo a elimina e diferencia entre “acoso sexual” y “asalto sexual”, sancionando cualkier tipo di acto sexual no consensual. E gobierno, sindicato di hungado, hungadonan y hopi ciudadano di e pais a muestra nan apoyo pa Hermoso, mientras tanto cu Rubiales a ser expulsa hasta mientras e ta nenga di renuncia. Rubiales a ser suspendi for di su posicion pa FIFA dia 27 di augustus, un dia despues cu el a nenga di renuncia ora el a duna un discurso pa e asamblea general di su federacion, den cual el a bisa cu e ta vic-

tima di un “witch hunt” pa “feministanan falso.” Rubiales a ser prohibi di funciona den su rol pa 90 dia mientras cu e huesnan disciplinario di e cuerpo ta considera su caso. FIFA por impone sancionnan riba individualnan variando for di advertencia y boet pa suspension for di e deporte. Ademá di esey, Rubiales por enfrenta cu accion for di gobierno Spaño. Un panel legal di gobierno di deporte a considera pa determina si el a abusa di su autoridad por medio di e sunchi of si el a daña e imagen Spaño cu su conducta. Pero e decision di Hermoso ta representa e reto mas grandi pa Rubiales te awo mirando cu esaki por resulta den un caso criminal. E oficina di fiscal a bisa cu Hermoso a haci e acusacion diamars. Fiscalnan a bisa siman pasa cu nan ta bay reuni cu Hermoso pa dun’e e oportunidad pa presente e acusacion contra Rubiales. E comportamiento di Ru-

biales durante e final, cual a inclui garmiento di su parti priva mientras cu e tabata para banda di figuranan Spaño importante, incluyendo e reina y prinses di e pais, combina cu su discurso controversial a dividi futbol Spaño. Despues cu Rubiales a nenga di retira siman pasa y a acusa Hermoso di gañamento, henter e team di e ganadonan di Copa Mundial, hunto cu decenas di hungadonan, a bisa cu nan no lo hunga atrobe pa Spaña te ora cu e presidente retira. E team nacional di hungadonan masculino tambe a ser afecta. Entrenador Luis de la Fuente mester a pidi disculpa despues cu el a muestra apoyo pa e discurso di Rubiales. Su hungadonan tambe a condena e comportamiento di e presidente den un declaracion. E gobierno Spaño y e hungadonan femenino ta spera cu e critica contra Rubiales por resulta den e adresamento di sexismo den futbol.



Bista Politico ta un seccion di Bon Dia Aruba specialmente pa brinda oportunidad na tanto partido politico como politico individual pa expone nan opinion. Contenido publica di ningun manera ta refleha opinion di Bon Dia Aruba y ta pa responsabilidad exclusivo di e organisacion/individuo cu ta ofrece esaki pa publicacion. Bon Dia Aruba ta reserva e derecho di no publica texto ofreci, si esaki segun e medio no ta cuadra cu e normanan di decencia cu nos ta mantene, pa evita contenido cu ta innecesariamente ofensivo. Esaki suheto na evaluacion exclusivo di Bon Dia Aruba.

BISTA POLITICO

Minister Geoffrey Wever durante OV #26:

Nos kier haci impacto riba centro di ciudad sin tin cu manca e begroting di gobierno

Durante reunion publico den Parlamento di Aruba, Minister Geoffrey Wever a enfoca riba e diferente esfuersonan andando cu focus riba centro di ciudad Oranjestad, como tambe San Nicolas.

Den Oranjestad entre otro a inverti den renobacion di Huize Veneranda. Aunke e trabounan no a inicia ainda, pronto lo mira e ground breaking. E vision ta pa eleva fluho di hende den e ciudad. Cu e mudamento di Departamento di Asuntonan Economico pa Huize Veneranda, y e mesun idea pa otro proyectonan den e area—manera Freezone, CBS, Aruba Fair Trade Authority—Gobierno di Aruba ta muestra su compromiso pa inverti den crea e atmosfera necesario pa atrae inversion priva den e area.

Renobacion di Columbusstraat y Wilhelminastraat a conoce retrasonan berdad, pero minister a indica cu e inversionnan adicional necesario mester a ser haci pa drecha infraestructura di rioolering bou di tera. Aunke no ta trabou cu hende lo por mira of aprecia, e ta necesario pa a haci e trabounan di reconstruccion di e 'bakprofiel' bou tera den e area,

prome por a continua trabou ariba di tera. Pronto fase 1 di revitalisacion di e area lo termina, y e area lo por beneficia di e su espacio, accesibilidad y bunitesa, cual, lo trece balor agrega pa tur compania cercano.

Minister Wever a indica cu lo tin 500 mil Florin extra aloca den presupuesto pa Oranjestad. Originalmente proyecto tabata inclui 3 fase, incluyendo parkeo. Pero pa por sigura cu no ta sacrifica e area di parkeo despues cu costonan extra di 'bakprofiel' a surgi, a aloca e fondo aki pa por completa cu e proyecto toch den su totalidad, pa asina por tin e balor agrega pa comerciantenan.

“Nos kier haci nos impacto sin tin cu manca e begroting di gobierno.”

Asina Minister Wever a enfatisa durante su disertacion, mirando e impacto di inversionnan plania. Minister Wever a menciona di ta agradecido pa e colaboracion inter-ministerial cu ministernan Tjong, Oduber, Arends y su persona, pa eleva seguridad den e area di centro di ciudad, cual ta sostene e vision total.



“Ta importante pa duna claridad unda nos ta inverti fondonan di Aruba. Mi ta gradici Parlamentarionan pa nan preguntanan”, minister Wever a clausura.

Parlamentario mr. Edgard Vrolijk (MEP):

Parlamento ta wardando riba contestacion di Hulanda riba preguntanan di RAft di 20 mei 2022 (parti 2)

Na e momentonan aki un punto di discusion ta e ley di consenso yama Rijkswet Aruba Financieel Toezicht cu nos conoce como RAft. Un concepto di ley cu desde juli 2020 den pleno pandemia a trece hopi rabia y discordia con esaki a ser presenta den momentonan mas critico di salud y financiero di pais Aruba. E proceso con esaki a ser encamina, mescos cu ta e caso di COHO, a ser condena y cuestiona durante reunion di IPKO no solamente pa Parlamento di Aruba so, sino tambe door di e mesun Parlamentarionan Hulandes. Esaki no solamente a wordo registra den e afsprakenlijst di mei 2022 na Sint Maarten, pero tambe den e propio verslag di Parlamento di Aruba cu a bay dia 20 di mei 2022 pa Gobierno di Reino Hulandes cu te dia di awe no a wordo contesta. Den e parti 1 di e articulo mi a elabora riba procedura di un ley di Reino y den e parti aki mi lo elabora riba nos propio verslag entrega dia 20 mei 2022.

Dicon no ta contesta y ta insisti pa Parlamento duna su aprobacion sin haya contesta?

Bou di un presion enorme di tempo Parlamento di Aruba mester a entrega



su preguntanan den forma di un verslag dia 20 di mei 2022, di cua te cu dia di awe nos no a ricibi contestacion. Sigur como Parlamentario mi ta puntra mi mes dicon Hulanda ta keda exige pa Parlamento duna su aprobacion pa asina por sigui e proceduranan mientras cu e procedura, cu ta hancra den nos Statuto, ta existi cu e preguntanan critico di e Parlamentarionan di Aruba como di Tweede Kamer mester wordo contesta. Mi lo duna algun ehempel di puntonan cu a bin dilanti den e verslag cu nos lo kier wak cambia si kier papia di un ley di consenso.

Un di nos puntonan cu sigur nos kier wak cambio ta cu ta duna Aruba un periodo mas largo di por paga bek y den cuadro di nos situacion fian-

ciero lo ta prudente tambe pa duna nos un periodo di gracia pa cuminsa paga. Otro punto ta pakico nos no ta haya mesun trato cu Corsou y Sint Maarten a haya na october 2010 ora nan a bay pa un ley di consenso di Reino. Corsou y Sint Maarten a haya inscripcion na interes abao pa nan debenan y dispensacion pa tur nan debenan cu tabata alrededor di 3 bion florin.

Den nos caso nos ta pidi pa incorpora den e ley cu nos debenan internacional tambe por conoce un inscripcion na interes abao, cu lo nifica cu nos lo por salba rond 70 a 80 milyon florin pa aña na interes so di e MEGA DEBE di Mike Eman. E cambio aki, cu lo scapa nos hopi na interes no mester bay solamente pa paga debe, pero un gran parti tambe mester bay den inversionnan cu ta hopi necesario den nos pais. Mi persona ta pensa riba un reparticion di 50%-50% lo ta uno cu nos por acepta. Banda di esaki mester bin un articulo unda cu despues di 3 aña ta evalua e ley aki y si ta necesario pa haci cambionan pa asina e por funciona optimalmente y preveni loke ta pasando cu RFT, unda cu tin rapportnan cu ta indica cu e ley aki ta e matando economia di Corsou y Sint Maarten y cu e mester wordo modifica.

Un otro punto cu mi no ta di acuerdo cune y cu mester wordo modifica ta e salida di e ley cu den e concepto no ta bon defini. Den e concepto actual ta exige pa bin cu un cambio constitucional cu ta surpasa autoridad Hulandes. Den e clausula di salida mester bin un punto unda cu si Aruba como pais haya un banco cu por financia e debe di Afl. 916 milyon na un porcentahe cu ta miho cu e 6 a 8 %, cu awo ta manera guillotina riba mesa, cu Hulanda ta coopera pa Aruba por haci esaki. Finalmente, na momento cu Aruba di paga e debe e rijkswet ta caba y e supervision ta transforma su mes den un ley local manera nos a bin ta conoce como e LAft.

Mi ta kere ta boluntad mester tin y sigur si nos kier papia di un ley di consenso, Hulanda mester cuminsa duna oido y tene tuma na serio e puntonan cu pa Aruba ta importante y asina yega na otro. Nos como pais siguramente ta buscando un miho acuerdo cu lo beneficia nos pais y di otro banda tin Hulanda cu lo ser garantiza cu e ta haya su placa bek. Pues mi ta haci apelacion na ambos Gobierno pa sinta cu cabes friu y repasa un biaha mas e preguntanan haci den e verslag di Parlamento y busca e consenso na bienestar di Reino Hulandes.

Bista Politico ta un seccion di **Bon Dia Aruba** specialmente pa brinda oportunidad na tanto partido politico como politico individual pa expone nan opinion. Contenido publica di ningun manera ta refleha opinion di **Bon Dia Aruba** y ta pa responsabilidad exclusivo di e organisacion/individuo cu ta ofrece esaki pa publicacion. **Bon Dia Aruba** ta reserva e derecho di no publica texto ofreci, si esaki segun e medio no ta cuadra cu e normanan di decencia cu nos ta mantene, pa evita contenido cu ta innecesariamente ofensivo. Esaki suheto na evaluacion exclusivo di **Bon Dia Aruba**.

BISTA POLITICO

Minister Endy Croes ta felicita e 62 agentenan policial cu a ricibi nan diploma

Diabierna mainta, den un esfera ameno rondona pa famia- y coleganan 62 agente policial a ricibi nan diploma. Minister Endy Croes a representa colega Minister Rocco Tjon na e ocasion special aki. Ta trata aki di 62 agente policial di tres diferente klas cu a ricibi diploma Basico di Polis, estudio policial nivel cuater di MBO y Hoger Kader Opleiding (HKO).

Minister Endy Croes hunto cu altocomisario Sr. Ramon Arnhem y hefe di Scol di Polis Sra. Jeannette Richardson-Baars a otorga diploma na e agentenan policial. Minister Endy Croes a hiba palabra e mainta aki unda a subraya e



echo cu si mira con criminalidad ta desaroya ta importante pa nos percura cu Cuerpo Policial Aruba como organisacion por cumpli cu e demanda cu e desaroyo aki ta trece cu ne. P'esey conforme e plan di maneho di Ministerio di Husticia e punto primordial ta pa keda

inverti den e capital humano y inverti den nos agentenan policial. Door di crea condicionnan di trabou adecua, percura pa tin e materialnan necesario, pero tambe sigui expande conocimiento door di haci inversionnan valioso den educacion. Educacion ta e motor di un pais y cu e inversionnan aki pueblo por ta trankil y tin e confiansa cu Cuerpo Policial Aruba ta keda garantisa e seguridad pa henter nos comunidad. Cuerpo Policial Aruba ta memey di un reorganizacion y esaki ta sumamente importante mirando e diferente fenomenon di criminalidad cu ta wordo señala, entre otro, e "criminaliteit beeld analyse" cu recién a wordo emití. Pa



e proceso aki por cana bon e liderazgo di cada un agente policial ta asina importante. Liderazgo personal paso na final di dia imagen di Cuerpo Policial Aruba ta wordo influencia den e bon sentido y kisas menos positivo door di actitud y liderazgo. Cada un agente policial ta un lider riba nan mes y esey ta fortifica Cuerpo Policial Aruba. Como organisacion Cuerpo Policial Aruba a caba di celebra 37 aniversario. Na esnan

mas jong, boso ta forma parti di un cuerpo dinamico cu ta brinda un carera bunita y na esnan mas experiencia e ta den boso man hunto cu alto mando pa percura pa e cuerpo aki por celebra hopi aña mas y sigui gosa di e respet tanto local como internacional. Pa conclui, den nomber di Gobierno di Aruba, Minister Endy Croes a felicita e 62 agentenan policial cu a ricibi nan diploma. Masha pabien y hopi exito!

Parlamentario drs. Mervin Wyatt-Ras:

Minister Arends a instrui coalicion pa vota contra mocion pro SABA

Esey ta loke e parlamentario di Partido di Pueblo Arubano (AVP) a indica cu a sosode e siman aki durante e reunion publico pa tratamiento di presupuesto supletorio 2023 y cu e ta considera importante pa pueblo ta na altura di dje.

Fuera di cu a obliga Parlamento di Aruba pa trata un presupuesto supletorio cu no ta basa riba realidad, manera cu Raad van Advies mes a indica y adverti, Gabinete Wever-Croesdi un forma fragante ta instrui esunnan cu



lo mester ta representante di

pueblo, con pa vota riba mocionnan.

Pa Wyatt-Ras no tin duda cu gobierno kier sconde solo cu un dede e situacion real di nos isla, esta cu door di tur medida a afecta e ciudadano mas humilde, mescos cu e comerciante chikito. "Ki bal bo tin progreso den entrada, pero pueblo no tin pan pa pone riba mesa, ta kita nan awa, nan coriente, no por paga pa gasolin pa hiba mucha scol, ni paga mas na gasto di scol, uniform cu a bira mas caro, etc." e parlamentario a expresa na prensa.

Den un intento pa sali na de-

fensa di e ciudadano comun y especificamente di un grupo vulnerabel manera ta nos grandinan, AVP a presenta un mocion durante e reunion publico ya cu no por sigui wak con Minister Ursell Arends ta duna splicacion di e disputa cu ta hiba cu SABA riba e suma di subsidio. E caso sumario ta afectando mientrastanto e pago na trahadonan y henter e maneho di e entidad.

Wyatt-Ras: "P'esey AVP a presenta un mocion pa entrega suma necesario pa cumpli cu empleado, cu ta coriendo den atraso, ademas di loke

ta necesario pa loke gobierno mes ta exige di SABA, por ehempel un auditing di e bukinan cu ta costa 125 mil florin pa aña", sin conta ainda e cuenta anual y loke esey ta costa. "E intencion di AVP ta pa garantisa cu e cuido di nos grandi ta uno cualitativo," e parlamentario a afirma.

Lamentablemente e minister mes a tuma rienda di e reunion, y manera custumber di e coalicion aki, a pidi parlamento pa no apoya e mocion. Peticion cu, manera tabata di spera, parlamentarionan di fraccion MEP y RAIZ a cumpli cabalmente.

Parlamentario mr. drs. Mervin Wyatt-Ras (AVP):

Gabinete Wever-Croes II kier sigui studia mientras nos grandinan ta sufri

Parlamentario di fraccion di Partido di Pueblo Arubano AVP y un profesional cu ta bin di sector di trabou social, esta mr. drs. Mervin Wyatt-Ras ta kere cu Gabinete Wever-Croes II a haya mas cu suficiente oportunidad pa atende cu e situacion di personal di SABA, cual ta e institucion cu ta brinda cuido na nos grandinan.

Fuera di a tuma tur tempo pa laga haci estudio, e minister inicialmente no kier a

comparti cu Parlamento e rapportnan correspondiente. Sinembargo fraccion AVP a pone presion y a logra haya nan caminda por mira cu e conclusion ta cu mester paga e empleadonan. E ta un proceso cu a bira ora pa yega na cumplimento.

No ta aceptabel, segun Wyatt-Ras pa e mandatarionan sigui sconde y bira tras di informacion y argumento cu awo kier bin cu otro maneho pasobra e ta un cartera riba su mes. E sector ta existi pa hopi tempo caba y AVP a regula

esaki na 2017 pa medio di un departamento loke a habri posibilidad di haci mas. Asina mes, Gabinete Wever-Croes II ta scoge pa ataca un entidad cu pa añanan largo a duna e servicio optimal di un refugio pa nos grandinan.

Wyatt-Ras: "Ta manera ta un guerra tin cu nan. Ta un situacion cu na luga di bay dilanti, ta bay atras. Kier pasa tur tempo di mundo ta haci estudio. E gobierno aki kier studia, studia y studia en bes di ehecuta y traha efectivo pa nos comunidad."

E parlamentario ta para firme cu nos grandinan merece miho di e gobierno aki. MEP a priminti shelo y tera; te hasta cu lo baha edad di pension. Den shete aña no a cumpli y awo tra'i otro ta haya medida riba nos hendenan mas vulnerabel y cu no por mas. "No tin curason pa e ciudadano. P'esey AVP como oposicion ta sali na vanguardia di nan derecho," asina Wyatt-Ras a declara e siman aki demostrando cu no ta drumi riba ningun di e problemanan cu nos pais ta confronta.



Nochi di informacion na Centro di Barrio Playa Pabao

Topico: Bo comportacion den trafico

Directiva di Centro di Barrio Playa Pabao ta invita habitantenan di Playa Pabao pa un anochi informativo den nos Centro. Topico ta: Bo Comportacion den Trafico. Nos ta cuminsa anochi pa 7'or y ta termina pa 8.30. Tur cos ta depende di e preguntanan. Moderador ta Sr. Wilfred Hart.

Sr Hart ta un polis (un biha polis semper polis) cu un trayecto impresionante di a sirbi su pueblo pa 35 aña y awo disfrutando di su pension. Pa mas informacion por lesa su CV. Si bo tin pregunta di e.o. reglanan di trafico, preferencia y ki ora bo ta pone "signal light" na un rotonde bo mester ta presente

diahuebs anochi, 7 di september, pa 7'or na Centro di Barrio Playa Pabao.

Wilfred Hart den su mesun palabra

Na aña 1980 despues di a traha tres aña na e departamento uniforme na Santa Cruz mi a wordo traslada pa e departamento di trafico na Balashi na unda mi a sigui curso con pa atende cu accidente na Corsou y mas despues mi a sigi curso di trafico mas avansa na Hulanda.

Despues di 11 aña na departamento di trafico mi a labora na Centrale Post y despues Recherche Oranjestad y mi a regresa na departamento de Trafico na Balashi na aña 1997.

Despues cu e ley di trafico nobo cu ta e Landsverordening Wegverkeer y e Landsbesluit nan a bay na vigor den aña 2000 mi a tene e coleganan di tur departamento uniforme na haltura di e cambio nan den e ley di trafico nobo aki.

Na aña 2000 mi a bira miembro di "Stichting School Verkeerscommissie Aruba unda mi a traha lesmateriaal di trafico nobo pa e scolnan basico y mi a duna les na e maestro nan di 5de klas.

Mi a traha diferente bukinan di trafico manera;

- Buki cu e borchinan di trafico na Papiamento y Hulandes.

- Buki pa examen di rijbewijs cu preguntanan na Papiamento y Hulandes.
- Buki di educacion di trafico pa e scolnan basico cu e number "Veilig, Prettig en efficiënt".
- Un buki di trafico na Papiamento cu e number "Nos Carioca"



otro) na polisnan uniforma di Aruba.

Na aña 2005 mi a traha como Projectleider na e oficina unda ta pasa examen pa tur categoria di rijbewijs.

Na aña 2010 despues di a traha 35 aña den Cuerpo Policial di Antillas y Aruba mi a baha cu pensioen.

Mi a duna lezing di trafico basa riba e cambio nan di e ley nobo na e.o. Personal di Rafinaderia Valero, De Palm Tours, Women's Club, OPPA, miembronan di Bubali Sport Club.

Mi a duna curso di V.R.O. (con pa core defensivo y sigur ora tin cu bay cu urgencia na un luga di accidente of

KPA:

Fecha pa entrega peticion pa benta di klapchi 2023

Cuerpo Policial Aruba ta informa tur persona cu kier bende klapchi pa aña 2023 pa tene cuenta cu e siguiente informacion pa entrega e formulario di peticion pa benta di klapchi 2023.

Bo por download e formulario di peticion digital ariba nos website www.kpa.aw den e seccion di servicio y bay den e balki di permiso. Yena y haci e rekisitonan y despues entrega esaki.

E formulario di peticion pa benta di klapchi por wordo entrega solamente na warda di polis Santa Cruz situa na Macuarima.

Por entrega e formulario desde diamars 15 di augustus 2023 te cu diaranson 15 november 2023. For di 8:30 mainta te cu 4'or atardi.

Cuerpo Policial ta informa cu despues di e fecha mencionada, no lo acepta ningun formulario pa peticion di permiso pa benta di klapchi. Ta pidi tur hende pa por favor tene bon cuenta cu esaki pa despues bo no haya bo cu sorpresa desagradabel of perdida financiero.


King Classic Sudoku





















			4			8		
		2	9		3			5
8	7					1		9
7				2				
4		1				9	7	
	3					4	5	2
	8	7			1	5		4
				4	5		9	8
	4	9	6					

Difficulty: ★★★

9/7

©2023 King Features Syndicate, Inc.

Resultado Sorteo 6 september 2023			
Cadena Alexander Lottery ta presenta resultado di weganan di suerte			
DIARIO	KORSOU	SUPER4	FLAMINGO
1869	9069	1018	-
7997	3073	SUPER5	-
8183	6969	-	-

MERDIA	ANOCHI		
 Sorteo # 4025 7262 9139 2393  FP  Sorteo # 4025 8985  Sorteo # 2081 1464  Sorteo # 4025 4783 Sagitario  Sorteo # 899 584  FP	 Sorteo # 8036 5516 3725 5898  X2  Sorteo # 7081 0270  Sorteo # 1786 3151  Sorteo # 5840 0013 Geminis  Sorteo # 770 027  X2	 Sorteo # 2421 0 x Jackpot 0 x Match 4+ 7 x match 4 212 x Afl. 12,00  Sorteo # 6231 0 x Jackpot 10 x Match 4 165 x Afl. 8,00  Sorteo # 0 x Jackpot 0 x match 4 0 x Afl. 500,00 0 x Afl 50,00 0 x Afl.15,00   Sorteo #	05-12-25-26-28 Joker 32 Letter E Proximo Jackpot 500.000,- 08-11-14-23-27 Proximo Jackpot 70.000,- Mega Ball: Proximo Jackpot 430.000,- Afl. 610.000,- 

Clasificado

ECONOMICO aviso@bondia.com

Personal GRATIS max. 20 palabra
 PASA LAGA BO AVISO NA OFICINA DI BON DIA
 ARUBA WESTSTRAAT#22 FOR DI 9:00AM-4:00PM
 Email nos na
 classified@espnv.com

SERVICIO PUBLICO
Limpieza pa cas y auto
 Presure wash cura di cas
 Laba muebles
 Laba tapijt
 Laba sienta di auto
 Laba vloer
Tel. 593 9464

SERVICIO PUBLICO
 Porch Sale
 diasabra 9/9/23
Tel. 582 5063

SERVICIO PUBLICO
 Buscando auto pa huur y na bon
 prijs? yama nos
Tel. 593 9953/ 593 8453

TA HUUR
 Cas na Bubali 17G
 3 camber / 2 baño
 Pa mas info
Tel. 561 1496 / 662 9832

TA BENDE
 BBQ Grill tipo cilinder
 "criyoyo" duradero
 Prijs Afl.250
Tel. 569 7787

SERVICIO PUBLICO
 Nos ta chapi, corta y planta
 mata, brinda tur servicio cu bo
 cura mester. Tira sushi afo, tur
 esaki na un super bon prijs
Tel. 738 1908

SERVICIO PUBLICO
 Sushi den cura pa solamente
 50,- pa buelta, nos ta lante lague
 limpi mane un soño.
 Arubiano trahado
Call 592 5766

SERVICIO PUBLICO
 Masaje reductores, terapias
 para el dolor, terapia infraroja,
 ventosas, kinesiotape, gimnasia
 pasiva, hilos magicos, trata-
 miento faciales
 Avicenastraat #18 local A
Tel. 566 1412 /561 8520

SERVICIO PUBLICO
 Ta traha y renoba Cas
 ta traha y drecha dak, ta basha
 vloer, pleister, verf cas, traha
 cura, pega mosaico y azulejo-
Tel.563 4168

SERVICIO PUBLICO
 Pa tur trabou di tapiceria di
 mueble, auto, yate y barco.
 Nos ta haci trabou di cabana y
 bambu y nos ta verf
Tel : 569 7539 /737 3993

TA BUSCA
 Fast Delivery Services N.V.
 Nos ta buscando un
 Handyman
 por pasa yena un aplicacion.
 Adres: Rumbastraat #20 of
 email: jobs@fastdeliverydc.com

TA BENDE
 1 box di palo den bon condicion
 Fls.50.00
Tel. 560 8929

TA HUUR
 Se alquila habitacion con todo
 incluido
 Brikstraat na Playa
Tel.564 1979

TA BENDE
 Combo di regalo pa
 tur ocasion:
 Mugs, kerki di biña, tablashi cu
 leyenda
 Pa mas informacion
Cell whatsapp 567 2907

SERVICIO PUBLICO
 Ta haci tur trabou di
 construccion y carpinteria y tur
 cos cu ta furamento di stul di
 bambu, cabana y toldos
Tel : 746 0518 / 569 7539

SERVICIO
 Unified One Events
 Photos , films, wedding
Tel. 749 2533

Sushi den cura?
 Ta piki sushi cu pick-up
 grandi pa Afl 75,= pa buelta.
 Yama nos na
561 4297 of 561 5179
 Hasi Aruba Limpi.

SERVICIO PUBLICO
 Nos ta haci trabou di
 plomeria, electricidad,
 hardineria incluye hiba sushi
 Handy man.
Tel.742 6250

SERVICIO PUBLICO
 Mi ta chapi, lanta sushi, corta
 mata, transporta frigidaire, was-
 machine biew, drecha cas, etc.
Tel. 564 1979

SERVICIO PUBLICO
 Pa haci trabow di verf y chapi,
 tur mantencion di pafor di cas
 Yama y puntra pa Benito na
Tel.630 5185

TA BUSCA
 trabou pa haci cas limpi,
 negoshi of oficina
Tel.561 3910

SERVICIO PUBLICO
 Handyman
 Pa trabouw di verfmento
 plumbing tuberia, chapi,
 limpieza di cura, drecha mata
Tel : 567 1108

SERVICIO PUBLICO
 Mi ta ofrece servicio pa haci
 reparacion di porta, ventana y
 hopi mas. Arubiano Balente
 Pa mas informacion por yama
Tel. 563 6762

FOR RENT
 Bunita cas na Gold Coast
 3 camber 2 1/2 baño, sala,
 comedor, cocina y patio. Pa
 mas informashon por
 whatsapp
+58 414 614 7440

SERVICIO PUBLICO
 Pa trabou di data-entry of
 update di bo administracion pls
 contact:
Tel.568 2339

SERVICIO PUBLICO
 Mi ta ofrece servicio di
 electricista en general corto
 circuito y mantencion
Tel.566 5026

TA BUSCA
 Señora cu auto dialuna pa
 diabierna pa busca yiu di skol,
 cushina y hasi limpieza di cas
 11.30 -5.30
Tel. 563 8822

TA HUUR
 Habitacion con todo incluido
Tel. 564 1979

SERVICIO PUBLICO
 Mi ta ofrece pa cuido di mucha
 di dialuna pa diabierna y
 weekend. Pa informacion
Tel. 558 7310

SERVIO PUBLICO
 Ta ofrece pa verf y chapi cura
 bon prijs. Nos ta hiba e sushi.
 Yama pa mas informacion na
563 4828 / 5679610

SERVICIO PUBLICO
 Hacemos todo tipo de construc-
 cion, reparacion de casas, pin-
 tura, acabados finos, jardines,
 patios, techos a buenos precios
Tel. 569 7539 / 746 0518



Cas Di Cultura
 Vondellaan 2 Aruba
 297-582-1010
F A D A
 Campanastraat 5 Aruba
 297-583-2999
 297-583-9610
F A V I
 Primavera 233 Aruba
 297-582-5051
 297-582-5222

F E P O
 Engelandstraat 15 Aruba
 297-583-1016
 297-583-6607

**Fundacion Contra
 Violencia Relacional**
 Tel: 583-5400

**Fundacion Autismo
 Aruba**
 Irenestraat 21 Aruba
 297-588-1179

**Fundacion Pa Nos
 Muchanan**
 Cumana 2 Aruba
 297-583-4247

**Fundacion Tel Pa
 Hubentud**
 Wilhelminastraat 19
 Aruba
 297-588-6138
**Koningin Wilhelmina
 Fonds**
 Spinozastraat 9 Aruba
 297-582-0412

Mary Joan Foundation
 Sabana Blanco 8 Aruba
 297-588-9999
Rode Kruis Aruba
 Pedro Gallegostraat 14
 Tel.297-582-2219
 Fax 588-3376

Famia Planea (SBVO)
 Avenida Milio J Croes 17
 B Aruba
 297-588-9591
 www.famiaplanea.org
 famiaplanea@hotmail.
 com

**Stichting Fundacion
 Guia Mi**
 George Madurostraat 34
 297-582-0088

Y M C A
 Calbasstraat 1 Aruba
 297-582-3072

AL-ANON group
 Sabana Liber #8, Noord
 (close to the hotels)
 Tel: 736-2952 or
 593-7081

Dokter na warda
Oranjestad **San Nicolas**
Hospital **Imsan**
 7:00 pm / 10:00 pm **24 ora**

Botica na warda
Oranjestad: **San Nicolas:**
 Trupiaal Seroe Preto
 Tel. 583 8560 Tel. 584 4833
EMERGENCIA **911**

POLIS
Oranjestad **100**
San Nicolas **104**
Santa Cruz **105**
Noord **107**
Tip Line **11141**
Brandweer **115**
Ambulance **911**
Hospital **527-4000**
Imsan **524-8833**
Warda Costa **913**
Seguridad Nacional **11911**
Cruz Cora **582-2219**

BOTICA
Aloe **584-4606**
4 Centro Medico **584-5794**
Central **585-1965**
Dakota **588-7364**
Del Pueblo **582-1253**
Eagle **587-9011**
Kibrahacha **583-4908**
Maria **585-8145**
Di Servicio Noord **586-4606**
Oduber **582-1780**
Paradera **588-6638**
San Lucas **584-5119**
San Nicolas **584-5712**
Santa Anna **586-8181**
Santa Cruz **585-8028**
Sero Preto **584-4833**
Trupial **583-8560**

UTILIDAD
Setar **117**
Web **525-4600**
Elmar **523-7147**

FUNERARIA
Aurora **588-6699**
Royal Funeral H. **586-4444**
Ad Patres **584-2299**
Olive Tree **584-8888**

Servicio di Taxi

**Aruba Transfer Tour &
 Taxi C.A.**
 Tel: 582 2116 /582 2010

Taxi Adres Services (24h)
 Tel. 587 5900

A1 Taxi Services Aruba
 Tel: 587-8850
 Tel: 280-2828
 Whatsapp: 592-7024

Aurora

Royal Pray

Funeral Home & Crematory

Cumana # 76 & # 44/ van Speyckstraat # 1
Oranjestad, Aruba
Telephone: (297) 588-6699
E-mail: info@aurorafuneralaruba.com

Lagrima y flornan por seca, su recuerdonan y tur loke el a haci y significa pa nos, lo keda graba pa semper den nos mente y curason.
"Cerca Dios mi alma ta na paz, ta di DJ'E mi salvacion ta bin"
Salmo 62:1

Cu dolor na nos curason, nos ta participa fayecimento di nos ser stima:



"Warrior Queen"
Dhayene N. A. Goitia Ras Tromp
*17-09-1988 - †02-09-2023

Na number di su:
Casa stimá: Johnny Goitia
Yiunan stimá: Dhaena y D'John Goitia
Mayornan: Naldi y Diana Tromp – Luidens
Ruman: Dhany Tromp y pareha Amber-Eline Kock
Suegro: Pedro Goitia (Venezuela)
Suegra: Norinda Ras
Swanan: Brian y Christian Goitia (Venezuela)
Sobrino y sobrinanan: Dhaeline, Dharelina y Dharvin Tromp
Welo y Welanan:
† Elio y Chichi Tromp – Rasmijn
† Juchi y † Olga Luidens – de Cuba
Tanta y Omonan:
Tanti Yol y Jonchito Croes – Tromp
Tanti Lidia y Omo Kepi Jong – Tromp
Tanti Asje y Omo Chalie de Palm – Tromp
Tanti Stella Luidens
Omo Tico y Sharline Luidens - Croes
Manera tantanan: Tante Glenda, Tisha y Liesje Tromp
Tanta y Omo Grandinan: Kitty, Roosje, Dina, Neda, Diana, Win, Maiky, Alsira, Chindy, Annie, Mario, Eloy, Betty, Tan Reina y Wito
Madrina y Padrino:
Astrid y Charles de Palm - Tromp
Irene van der Linden
Nana: Yaya

Primo & primanan:
Rosemary Luidens y pareha
Roseanne Luidens
Stephanie y Nigel Wix – Jong y yiunan Quinn y Benn
Lydienne y Joey Arends – Jong y yiunan Luke y Jay (USA)
Sharmayne de Palm y yiunan Dasey, Sunny, Leya y Mikey (NL)
Cookie Croes y yiu AJ (USA)
Leyon Croes y Weimin (NL)
Loney Croes y Dwight (NL)
Dwayne Luidens y Gennelay
Alexienne Luidens
Elyane Nicolaas y yiu JP (Bonaire)
Dionne Nicolaas y yiu Darjuan (Bonaire)
Juamar y Mientje Nicolaas y yiunan Mijuar y Jutian (Bonaire)
Amigo y amiganan:
Abi y Chieh Chen Lake, Nicole Nicolaas, Luis y Elizeth Bello,
Geraldine Geerman, Bancho y Josie Mansur, Kevin y Josie Kock,
Eduard y Jessica Dubero, Timmy y Joella, Tyson y Tanchi Croes,
Ivo y Ivanna Fernandez, Darren van Ommen y Amber, Kevin van Ommen y pareha, Tio Bincho y Tia Betchie
Staff Goitia Tennis Performance (GTP):
Coach Pepe, Coach Jeffrey, Coach Eduard, Coach Kevin, Coach Illienne
Coleganan di Aruba Racquet Club (ARC):
Kenneth y Claudia Ponson, Dito, Anabel, Karenza, Zoey, Mellisa y Emilia
Demas famia- y amiganan: Goitia, Tromp, Luidens, de Cuba, Ras, Rasmijn, Kock, Croes, Jong, de Palm, Nicolaas (Bonaire), Garcia, de Mey, Mora, Wever, Panneflek, Merryweather, Lee, Ponson, Baroud, Solagnier, Every y Kransen (USA), Mosquera y esnan na Venezuela, Bonaire, Curacao, NL, Colombia y USA
Graduacion na:
Jasmira, Julienne, Joanne, Tanti Asje, Personal di Wondenpoli, Dialyse afdeling y Dr. Kock
Oportunidad pa condolencia ta diahuebs 7 di September 2023 for di 7:00-9:00 PM na Royal Funeral Home

Acto di entierro lo tuma lugar diabierna 8 di September 2023 na Misa di Savaneta – Sagrado Curazon di Hesus di 2:00 – 4:00 PM. Despues ta sali pa Santana Catolico na Savaneta

Nos ta pidi nos sincero disculpa, si pa un of otro motibo nos a keda sin menciona algun persona.

Aurora

Royal Pray

Funeral Home & Crematory

Cumana # 76 & # 44/ van Speyckstraat # 1
Oranjestad, Aruba
Telephone: (297) 588-6699
E-mail: info@aurorafuneralaruba.com

Jehová es mi pastor; nada me faltará.
En lugares de delicados pastos me hará descansar;
Junto a aguas de reposo me pastoreará.
Confortará mi alma;
Me guiará por sendas de justicia por amor de su nombre.
Salmo 23: 1-3



David Segundo Perez Fuenmayor
*21-10-1962 - †31-08-2023

A nombre de su:
Yiunan:
Princesa Perez
Daviana Perez
Odalis Maria Perez Rivera
Karen del Carmen Perez Rivera
Yoneidis del Valle Perez Rivera
David Perez Julio Rivera
Mayerlin Andreina Ruiz Dominguez

Nietonan:
Maykel José escalante Pérez, Robert José escalante Pérez, Roimarys Alexandra Escalante Perez, Miguel David Chourio Perez, Mariangel Chourio Perez, Mathias David Lineros Perez, Daviana Perez
Madre: Yolanda Josefina Fuenmayor

Rumannan:
Ana Delia Cuadrado
María Natividad Fuenmayor
Rosa María Pérez Fuenmayor
Alida Rosa Perez Fuenmayor
Judit Coromoto Pérez Fuenmayor
Gabriel Antonio Pérez Fuenmayor
Maribel del Rosario Perez Fuenmayor
José Ramón Pérez Fuenmayor
Julio Pérez Fuenmayor
Luis Alberto Cuadrado
Demas sobrinos

Su cas unda eta biba: Sharon Tromp, Manchini da Silva, Juninho da Silva, Carmen Tromp
Su jefe di trabou: Many da Silva
Prima: Jahaira Chirino y yiunan

Amigo: Gabriel Alabaran
Amigo serca: Hernan y Lusmarina, Antonio Pastrana, Tito Zapata, Maria del Valle Marrufo Rivera

Acto de despedida sera el viernes 8 de septiembre del 2023 en Funeraria Aurora de 7:00 a 9:00 pm.

Aurora

Royal Pray

Funeral Home & Crematory

Cumana # 76 & # 44/ van Speyckstraat # 1
Oranjestad, Aruba
Telephone: (297) 588-6699
E-mail: info@aurorafuneralaruba.com

"Por cuanto en mí ha puesto su amor, yo también lo libraré; Le pondré en alto, por cuanto ha conocido mi nombre. Me invocará, y yo le responderé; Con él estaré yo en la angustia; Lo libraré y le glorificaré. Lo saciaré de larga vida, Y le mostraré mi salvación."
Salmos 91: 14-16

Cu hopi tristesa nos ta anuncia fayecimento di nos ser stima:



Genry Vega Ibarra
*18-08-1961 - †04-09-2023

Na number di su:
Casa:
Doris Stella Alzate Arias
Yiunan:
Nestor Vega
Yllerson Contreras
Yemirson Contreras
Henry Vega
Nieta:
Chloe Alani
Mayornan:
Rosa Ibarra
Pedro Ibarra

Coleganan di Wendy's & Retonde Fast Food
Ta invita pa acto di condolencia y despedida cual lo tuma lugar diabierna 8 di September 2023 na Aurora Funeral Home di 7'or pa 9'or di anochi. Cremacion lo tuma lugar despues.

Aurora

Royal Pray

Funeral Home & Crematory

"Señor ta mi wardador, mi'n tin falta di nada
Den cunucu di yerba berde e ta ponemi sosega.
E ta hibami na awa trankil,
Pa mi bolbe haña forsa".
Salmo: 23



Nos ta anuncia fayecimento di:

Guillermo Salesiano Ruiz
(Mito)
*07-06-1934 - †05-09-2023

Acto di entierro lo wordo anuncia despues.

Burning Man ta yegando su fin, pero e limpieza pa e inundacion pisa ta leu di caba

(AP) — E awasero a stop y e tempel a kima. Awo, mientras Burning Man poco poco ta keda bashi, ta ora pa haci limpi.

Organisadornan di Burning Man tin tres siman pa haci e tereno publico den Desierto Black Rock den nort occidente di Nevada limpi, pero un tormenta di berano a laga diesmiles di persona atrapa den lodo te nan enkel, afectando e tarea aki.

E reunion anual, cu a cuminsa na un beach na San Francisco na 1986, ta atrae casi 80mil artista, musico y activista pa henter un siman di campamento den desierto y presentacionnan avant-garde. Un di e principionan di Burning Man ta pa no laga nada atras - un expectativa cu tur



esnan presente lo bay back cu tur loke nan a trece na Black Rock City y haci nan campamento limpi prome cu bay.

Pero despues di awasero torencial cu a cera caminda, pegando trafico y forsando hopi pa cana miyenan pia abao den e lodo, e area ta yen di vehiculo, tapijt, mueble, tent y desperdicio laga atras. E suelo mes tin huella.

E siman aki, cantidad di atendiente a yega aeropuerto na Reno, Nevada, pa e ultimo vuelonan pa bay cas back. Companianan di Car Wash algun biaha a rechasa vehiculonan demasiado pega cu lodo, segun KTVN-TV na Reno. Tin señalnan pafo di supermercadonan cercano prohibiendo hende di deshaci di desperdicio relaciona cu Burning Man den nan baki-

nan pa reciclahe.

Un permisi emiti pa Bureau Mericano di Maneho di Tereno ta rekeri organisadornan di Burning Man pa laga e area limpi despues cu vehiculonan bandona e desierto, como 161km nort oriente di Reno. E organisadornan no a responde inmediatamente na pregunta di Associated Press riba con e awasero lo tin impacto riba e cronograma di limpieza.

Un ciere temporal di e area pa Burning Man ta den efecto pa 66 dia cada año, segun BLM: 31 pa construi e ciudad improvisa, nuebe pa e evento principal y 26 pa limpieza despues di e evento.

A164a pasa, despues cu e festival a bolbe despues di un

hiatus di dos año pa motibo di pandemia, e team di Burning Man apenas a logra pasa su inspeccion dia 7 di october. “Pero e tabata extraordinaria y alarmantemente cerca [di no logra],” segun manager di team di restauracion a skirbi anteriormente den un post riba website di Burning Man resumiendo esfuersonan di limpieza di año pasa, mientras a urgi atendientenan pa “recompromete” na su principionan central: No laga nada atras.

Proximo luna, teamnan di empleadonan federal y organisadornan di Burning Man ta bay bolbe e sitio di e festival pa un inspeccion. E organisadornan mester para responsabel pa cualkier reparacion cu keda determina ta necesario.

Fiscalnan buscando acusacion nobo contra Hunter Biden prome cu fin di september

(AP) — Fiscalnan federal na Merca tin plan pa busca un acusacion di gran hurado contra yiu di presidente Joe Biden, Hunter, prome cu fin di luna, segun documentonan entrega ayera.

E documentonan a yega den un caso di posesion di arma den cual ta acusa Hunter Biden di tin un arma di candela mientras ta un usuario di droga, maske fiscalnan no a nombra especificamente cua cargo nan ta bay busca. Tambe Hunter ta bao investigacion di fiscalnan federal pa su tratonan comercial.

Fiscalnan bao Procurador pa Delaware, David Weiss, recien nombra como consejero special den e caso, ta bisa cu nan ta spera un acusacion prome cu dia 29 di september.

Sinembargo, abogadonan di Hunter Biden ta argumenta cu fiscalnan ta prohibi di entrega cargonan adicional bao un acuerdo entre ambos banda anteriormente den e caso di arma. Ta contene un clausula di inmunidad contra acusacionnan federal pa otro crimennan potencial. Abogado di defensa Abbe Lowell



a bisa cu Hunter Biden a tene su mes na e terminonan di e acuerdo, incluyendo bishitanan regular na su oficial di fianza.

“Nos ta spera un resolucion husto pa e investigacion amplio di cinco año riba Sr. Biden cu tabata basa riba evidencia y ley, no riba presion

politico externo, y nos lo haci loke ta necesario den nomber di Sr. Biden pa logra esaki,” el a bisa den un declaracion.

Fiscalnan a bisa cu e acuerdo di arma ta morto hunto cu resto di e acuerdo di culpabilidad cu a pidi pa Hunter Biden admiti culpabilidad na delito di impuesto. Esaki a cay afo despues cu hues di Distrito Mericano, Maryellen Noreika a trece dilanti pregunta tocante esaki durante un audiencia den corte na juli. Departamento di Husticia no tabatin comentario inmediato.

Universidad George Washington den shelter in place despues cu sospechoso di homicidio ta huy for di hospital

(AP) — Universidad George Washington a emiti un orden di shelter in place ayera tardi despues cu un sospechoso di homicidio a huy for di custodia di polis na hospital di e universidad.

Departamento di Polis Metropolitano a anuncia riba plataforma di rednan social X cu Christopher Haynes a “huy di custodia” na e hospital tiki despues di 3:30pm. Den un comunicado di pren-

sa, polis a bisa cu Haynes, 30, a keda aresta anteriormente diaranson y acusa di “ofensa di homicidio.” No tabatin mas detaye inmediatamente. E informacion di polis no a bisa si Haynes tabata arma, pero a conseha hende pa no acerc’e si mir’e, y pa yama 911.

E universidad a manda mensahenan di texto adviertiendo cualkier persona riba e campus pa shelter in place “pa motibo di e individuo pelig-

roso cerca di e campus.” Pa 6pm, mas cu dos ora despues cu a emiti e orden si shelter in place, administracion di e universidad a manda mensahenan di texto bisando cu e orden ta continua y cancelando tur evento y actividad den anochi. E mensahe tabata bisa cu “les presencial ta cancela; ta curasha facultad pa duna les remotamente unda cu ta posibel. Evita area rond di GW Hospital.”



Nacionnan Uni lo duna 125 miyon dollar na 14 crisis humanitario sin fondo rond di mundo

(AP) - Nacionnan Uni a saca 125 miyon dollar for di su fondo di alivio pa emergencia riba diamars pa yuda e operacionnan humanitario sin suficiente fondo den 14 pais rond di mundo, citando cu e necesidadnan ta aumentando rapidamente.

Afghanistan y Yemen ta e 2 recipientenan top di e lista, cu cada un ricibiendo 20 miyon dollar, sigui pa Burkina Faso y Myanmar cu lo ricibi 9 miyon cada un y Mali, Haiti y Venezuela cu lo ricibi 8 miyon dollar cada un. U.N Central Emergency Relief Fund tambe lo provee 6.5 miyon dollar pa ambos Central African Republic y Mozambique, 6 miyon na Cameroon y teritorionan di Palestina y 4 miyon dollar na Malawi.

E fondo tambe lo provee 8 miyon dollar pa duna sosten na operacionnan di refugiadonan na Bangladesh y 6 miyon dollar pa refugiadonan na Uganda. "E ta un realidad cruel cu den varios operacion humanitario, e agencianan ta purbando di traha cu hopi tiki fondo na un momento unda e necesidadnan ta pidi pa e fondo aumenta," hefe humanitario di Nacionnan Uni a bisa na momento di anuncia e alocacionnan nobo.

El a splica cu e fondo aki por yuda yena algun buraco y



salba bidanan dank na e generosidad di un rango amplio di donadornan, "pero nos mester pa e donadornan individual tambe cuminsa duna mas, esaki ta un fondo di tur hende pa tur hende." E aña aki, Nacionnan Uni a apela pa mas di 55 biyon dollar, pa asina por yuda 250 miyon persona afecta pa conflicto, clima, desasternan natural, brote di malesanan y otro cisman. Sinembargo te cu awo, e apelacion a genera 16 biyon

dollar so, cual ta bao di 30 porciento di e fondonan cu mester.

E 125 miyon dollar di Central Emergency Relief Fund ta trece e cantidad total aloca pa e emergencianan sin fondo e aña aki na mas di 270 miyon dollar, cual ta e cantidad mas halto desde cu e fondo a keda estableci den aña 2005. E oficina humanitario di Nacionnan Uni a bisa cu esaki ta refelha e "necesidadnan hu-

manitario cu ta aumentando rapidamente y e hecho cu fondonan regular di donadornan no ta aumentando na e mesun velocidad."

El a señala tambe na diamars su anuncio di Nacionnan Uni su World Food Program, cual a anuncia cu nan lo mester recorta 2 miyon persona den Afghanistan di nan asistencia di cuminda e luna aki a causa di falta di fondo. Esaki ta trece e cantidad total di

personanan di Afghanistan cu a perde e sosten aki na 10 miyon. Den e lunanan binidero, World Food Program a anuncia cu nan lo por provee cuminda na solamente 3 miyon persona. E agencia basa na Roma a bisa cu pa por sigui e trabao, nan ta rekeri 1 biyon dollar. E 1 biyon dollar aki ta e cantidad di fondo necesario pa por yega na e 21 miyon persona den necesidad pa e siguiente 6 lunanan.

Belarus ta prohibi ciudadanonan fuera di e pais renoba nan paspoort



(AP) - Belarus su presidente autoritario a anuncia diamars cu lo prohibi e ciudadanonan fuera di e pais renoba nan paspoort, un decision cu por obliga e personanan cu a huy for di e pais bolbe back pa asina por mantene nan documentonan di biahe.

A calcula cu mas o menos 200 pa 300,000 Belaruso a sali for di e pais den e ultimo 3 aña desde cu protestanan masivo contra un eleccion cu a regresa President Alexander Lukashenko den mando a cuminsa. E resultadonan di e eleccion a ser considera completamente manipula. Lukashenko su decreto a declara cu un paspoort Belaruso por ser renoba solamente unda e persona concerni tabata reg-

istra como residente prome cu el a sali for di e pais.

Lider di oposicion, Sviatlana Tsikhanouskaya, ken a huy pa Lithuania despues di a desafiar Lukashenko den e eleccion di aña 2020, a adverti e Belarusonan biando "aunke cu bo paspoort caduca, no bolbe back cas si bo ta core riesgo di persecucion."

Tsikhanouskaya a conta The Associated Press cu Poland y Lithuania a duna un tipo di "paspoort di stranhero" na Belarusonan cu ta permiti nan keda den e paisnan aki. E grupo cu ta boga pa derechonan humano Belaruso Viasna a bisa cu ya caba 1,500 persona ta den prizon actualmente como prizonero politico.